

## سرى للغاية

محضر اجتماع اللجنة التنفيذية العليا للاتحاد الاشتراكي العربي

برئاسة الرئيس جمال عبد الناصر

القاهرة - مقر الاتحاد الاشتراكي في ٢٣ يناير ١٩٦٨

من سعت ١٨٤٥ الى سعت ٢١٢٠

## الحاضرون

الرئيس جمال عبد الناصر، زكريا محي الدين..  
نائب الرئيس، أنور السادات.. رئيس مجلس الأمة،  
حسين الشافعي.. نائب الرئيس، صدقي سليمان..  
نائب الرئيس، على صبرى.. نائب الرئيس، عبد  
المنعم القيسوني.. وزير التخطيط، حسن عباس  
زكى.. وزير الاقتصاد والتجارة الخارجية، نزيه  
صيف.. وزير الخزانة، عزيز صدقي.. وزير  
الصناعة، كمال رفعت.. وزير العمل، محمود  
يونس.. وزير البترول، عبد الوهاب البشري.. وزير  
الانتاج الحربي، لبيب شقير.. وزير التعليم العالي،  
عبد المحسن أبو النور.. وزير الدولة.

## المحتويات

### الصفحة

### الموضوع

- ١- كشف بالقروض التي كانت موجودة قبل ثورة ٢٣ يوليو ١٩٥٢، فائض الحاصلات الزراعية، اتفاقيات المعونة مع الولايات المتحدة، سندات انتقال الملكية من القطاع الخاص الى القطاع العام؛ سندات التأمين والاصلاح الزراعي والتعويض، والقروض الداخلية والخارجية، والالتزامات العسكرية
- ١ مناقشة كيف تسدد الالتزامات المالية، وتلافى أخطاء النظام لتخفيض المديونية الخارجية ومواجهة نقص النقد الأجنبي، وتأثير ذلك على السياسة الخارجية والعلاقات الدولية
- ٦
- ٢- عبد الناصر.. خطأ تقدير التدخل العسكري في اليمن، وموافقة جميع أعضاء مجلس الرئاسة عليه؛ ومنهم عبد اللطيف البغدادي وكمال الدين حسين
- ١٤
- ٣- متابعة مناقشة حلول الوضع الاقتصادي المتأزم
- ١٥
- ٤- سيد مرعي.. حجم الموارد والاستثمار الصناعي والزراعي، القطاع العام والخاص
- ٤٣
- ٥- لبيب شقير، كمال رفعت.. مناقشة مشاكل القطاع الاقتصادي الموجود
- ٥٠ - ٥٦

## سرى للغاية

محضر اجتماع اللجنة التنفيذية العليا للاتحاد الاشتراكي العربي

برئاسة الرئيس جمال عبد الناصر

القاهرة - مقر الاتحاد الاشتراكي في ٢٣ يناير ١٩٦٨

من سعت ١٨٤٥ الى سعت ٢١٢٠

القيسونى: أنا باسناذن إنى أقول تعليق بسيط على كشف الالتزامات اللى كان قدمه السيد حسين الشافعى: كان كشف الالتزامات اللى أشار اليه السيد حسين الشافعى فى الجلسة الماضية كان بيبين إن مجموع القروض المحلية والقروض الخارجية اللى احنا ملتزمين بها فى ٦٧/٦/٣٠ حوالى ٢٧٠٠ مليون جنيه.

لو سمح لى السيد الرئيس أنا بدى أعرض بعض نقط متعلقة بهذا الكشف:  
أولاً: الكشف يتضمن كل القروض التى كانت موجودة قبل الثورة وقبضت بعد الثورة، يعنى إذا أخذنا الوضع فى سنة ١٩٥٢، كان علينا حوالى ٢٠٠ مليون جنيه أو ١٥٠ مليون جنيه؛ كان علينا سنة ١٩٥٢ القرض الوطنى طويل الأجل والقرض الوطنى متوسط الأجل وقرض القطن وقرض فلسطين.. وقرض فلسطين والأدونات حوالى ١٥٠ مليون جنيه.

وبعدين الكشف يشمل أيضا فائض الحاصلات الزراعية بحوالى ٢٠٠ مليون جنيه أو ١٨٦ مليون جنيه.. دى فائض الحاصلات الزراعية، طبعا الجانب اللى بالعملة المحلية من فائض الحاصلات الزراعية، مفيش فى الاتفاقيات بينا وبين الجانب الأمريكى ماينص على وجوب تحويل هذا المبلغ.

وطبعا كل المعونات اللى قدمتها الولايات المتحدة للدول التى أخذت ال Marshal plan - يعنى حتى قبلنا بعشرين سنة - ماتحولتتس يعنى لازالت دين، يعنى لازالت موجودة لدى الدول الأوربية. وكانت فى وقت من الأوقات حتى فكروا إنهم يستخدموا الأموال اللى لهم فى أوروبا علشان مساعدة الدول النامية. وكان أثير فى هذا الموضوع مشروع اسمه مشروع "تيللا" بتاع إيطاليا؛ لأن مشروع "تيللا" يعنى إيطاليا تحل محل أمريكا وتعطى معونات لمصر والدول الثانية، وبعدين مامشيش مفيش دولة من الدول الأوروبية التى أخذت معونات من الولايات المتحدة سددت هذه المعونات.

واحنا فى الاتفاقيات التى بينا وبين الولايات المتحدة، مفيش غير نص بـ ٣٪ أو ٤٪ اللى احنا ملتزمين بسداده.. ودا سددهنا، الباقي اللى بالعملة المحلية متروك عايم؛ يعنى مفيش أى التزام علينا بتحويله الى الخارج.. فدا ٢٠٠ مليون جنيه أخرى.

## سرى للغاية

بعدين فيه سندات التعويض، سندات تأمين البنوك وسندات الإصلاح الزراعى وسندات التأمين وسندات التعويض حوالى ١٣٠ مليون جنيه. دى طبعا مهياش قروض ولكن انتقال ملكية؛ أنا باعتبارها انتقال ملكية من القطاع الخاص الى القطاع العام.. دا فيما يختص بالقروض الداخلية.

وبعدين فيما يختص بالقروض الخارجية، القروض الخارجية باينه هنا إنها ٧٢٨ مليون جنيه، وأنا راجعت هذا الرقم اليومين الأخيرين وأنا باعتقد إنه هو مستمد من أرقام وزارة الاقتصاد.

وأرقام وزارة الاقتصاد يعنى مبنية على تعريف معين للالتزامات الخارجية، إذا أخذنا بهذا التعريف هيبقى الرقم دا سليم، لكن أنا بقول: التعريف نفسه قابل للمناقشة؛ باعتبار إن وزارة الاقتصاد بتعتبر أن الدين الخارجى ينشأ عند إبرام العقد.. بمعنى إن مثلا اتفاقية التعاون الاقتصادى بتاعة سنة ١٩٦٤ مع الاتحاد السوفيتى، أبرمت العقود الخاصة بها بحوالى ١١٧ مليون جنيه فاعتبرت أنها دين، وحسبت الفوائد المستحقة عليها كمان ٢٠، ٣٠ مليون.

فاعتبر إن علينا التزام بـ ١٣٠ مليون جنيه، بينما إن الآلات والمعدات التى وصلت على هذه الاتفاقية لا تتجاوز يمكن ١٥ أو ٢٠ مليون جنيه. فإذا اعتبرنا إن الالتزام الحقيقى هو ما يساوى المعدات والآلات اللى وصلت فعلا واللى خلقت التزام وليس العقود التى أبرمت، فيعنى الرقم دا ينزل لحوالى ٢٢٥ مليون جنيه؛ ٢٢٥ مليون جنيه اللى هو الـ ٧٢٧ اللى هو يمثل الفرق بين قيمة العقود وقيمة الآلات التى وصلت، وطبعا كمان الفوائد لأن الفوائد يعنى هنضيفها على الالتزام ولاّ منضيفهاش؟! أنا بقول: إننا منضيفهاش؛ لأننا لا نضيف عائد المشروع يعنى إذا كنا نحسب فوائد لازم أضيف العائد.

الشافعى: يعنى يرسى على ٥٠٠ يعنى؟

القيسونى: يرسى على ٥٠٠.

سليمان: التمويل بالعجز اللى جاء فى المذكرة بتاعتك ٦٤٩,٥.

## سرى للغاية

القيسونى: لأ.. دا التمويل بالعجز الداخلى يمكن.

سليمان: لأ الخارجى.. الخارجى.

القيسونى: هو على كل حال لأ.. هو الـ ٤١٧ فى الخطة الخمسية الأولى وحوالى ١٥٠ أو ١٦٠ فى السنتين الأولى والثانية، كانت قابلة.. ولكن يعنى الأرقام بتاع الديون الخارجية الموجودة عندنا بعد المراجعة مع البنك المركزى إمبراح والنهارده، بتبين إن الرقم دا لو أخذ بتعريف إن الالتزام هو قيمة الآلات التى وصلت ببقى متضخم بـ ٢٢٥ مليون جنيه.. يعنى يبقى قيمة الفرق الللى أنا شايه بين الـ ٢٧٠٠ الللى جاية فى الكشف وبين الحاجات الللى كانت موجودة إما قبل الثورة أو الحاجات الـ ١٨٦ مليون بتاعة فائض الحاصلات الزراعية، أنا باقتراح استبعادها، والـ ٢٠٠ مليون جنيه التضخم فى القروض والتسهيلات الخارجية يعنى حوالى ٧٠٠ مليون جنيه؛ فيترك ٢٠٠٠ مليون جنيه؛ ٢٠٠٠ مليون جنيه قيمة العبء الاقتصادى الللى علينا الذى يمثل التزامات التى التزمنا بها نتيجة للظروف الاقتصادية أو للإجراءات الاقتصادية المختلفة، فيه خلاف هذا الالتزامات العسكرية.

وبعدين إذا قارنا بين سنة ١٩٦٠ وبين سنة ١٩٦٧..

أولاً: قبل أن ندخل فى هذه المقارنة، الـ ٢٠٠٠ مليون جنيه دى يعنى يجب أن نضع مقابلها فى الجانب الآخر كل الأصول الللى احنا أخذناها يعنى الللى حصلنا عليها.. قناة السويس، كل التأميمات الللى حصلت فى سنة ١٩٥٦ ودفعنا تعويضات عنها، التعويضات التى دفعناها للسودان.. سحب العملة فى السودان، وبعدين كل الـ ٨٠٠ مليون جنيه فى الصناعة، مش عارف ٤٠٠ مليون جنيه فى السد العالى. كل الأصول التى بنيت والكهرباء والسكك الحديدية والمواصلات والموانى والترسانة والحاجات دى كلها يعنى دى أصول جديدة أضيفت لثروة البلد، يجب أن تؤخذ فى الاعتبار عند مقارنتها بقيمة الالتزامات المستحقة علينا. فالالتزامات المستحقة علينا لم تصرف هباء، ولكن تمثل أصول حقيقية وثروة حقيقية موجودة فى البلد وبنيت فى البلد خلال الـ ١٥ سنة الأخيرة.

فى السبع سنوات من ١٩٦٠/٦/٣٠ الى ٦٧/٦/٣٠ زادت القروض الداخلية والخارجية بحوالى ٢١٠٠ مليون جنيه، لو شلنا منها ١٨٦ مليون جنيه الللى هى فائض الحاصلات الزراعية التى نشأت فى خلال هذه الفترة، ولو شلنا منها سندات التعويض حوالى ١٠٠ مليون جنيه، ولو شلنا الـ ٢٠٠ مليون جنيه بتاعة التضخم فى القروض

## سرى للغاية

الخارجية؛ يبقى ٤٨٦ حوالى ٥٠٠ مليون جنيه من ٢١٠٠، يعنى حوالى ١٦٠٠ مليون جنيه تمثل الزيادة فى المديونية فى سبع سنوات. يقابل هذه الزيادة فى المديونية طبعا كل الزيادة فى الاستثمارات التى حصلت.

يعنى وإحنا كان فيه قاعدة مقررة - مهياش حاجة جديدة - قاعدة مقررة إننا بنبنى استثمارات بالافتراض. يعنى ماإحناش عايزين نفرض على الناس ضرائب علشان نمول الاستثمارات، ولكن بنقترض علشان نمول الاستثمارات. إحنا من حسن الحظ إننا أوجدنا طرق أو وسائل جديدة لتشجيع الإدخار أو تمويل؛ بصفة خاصة صندوق التأمين والمعاشات وهيئات الإدخار المختلفة والتأمينات الاجتماعية وشهادات الاستثمار، علاوة على الافتراض من البنوك.

وبعدين أنا برضه أضيف الى ذلك إن المديونية دي عبارة عن شكل حسابى أو وسيلة حسابية لإظهار علاقة مالية، يعنى أقصد من كده إيه؟ إن إذا كنا فى القطاع الخاص مثلا أو إذا قلنا النهارده إن الـ ٨٠٠ مليون جنيه دول بتوع الصناعة اللي صرفناهم فى الصناعة من سنة ١٩٥٢ لغاية دلوقتى، بدل مايقوا ملك القطاع العام نطلع بيهم أسهم ونملكهم، ولو حتى نملكهم لهيئات الإدخار يعنى صندوق التأمين والمعاشات يبقوا أسهم وهيطلعوا من المديونية على طول، نبص نلقى المديونية نزلت ٨٠٠ مليون جنيه.

إذا قلنا نفس الحكاية بالنسبة لفنادق السياحة بالنسبة للأتوبيسات بالنسبة للصنادل إذا عملناها شركات وحولنا رأسمالها الى أسهم بدل ما هو ملك للقطاع العام ويقابله سندات، إذا عملناه أسهم وملكانه إما للقطاع الخاص أو من غير ما نغير الـ system الاجتماعى بتاعنا ملكناه لهيئات التأمين والمعاشات اللي هى هيئات تابعة للقطاع العام، برضه هنبص نلقى المديونية نزلت نزول قوى.. قوى.

عبد الناصر: أو لرؤوس أموال أجنبية.

القيسونى: لأ.. بلاش دي يافندم.

عبد الناصر: لأ.. بافكرك.

القيسونى: دا التعليق اللي حبيت أقوله على الكشف.

## سرى للغاية

الشافعى: هو الحقيقة الواحد لما قدم هذا الكشف، يعنى كان يقدّمه على أساس إنه بيعبر عن ظاهرة لازم نتحقق من أساسها ومن حقيقتها. وإذا كان فيه اختلاف فى التعريفات سواء كان كوجهة نظر وزارة الاقتصاد أو الأخ حسن عباس بالذات فى تعريف إيه المديونية الخارجية، دا ممكن يعنى يحصل تنسيق بحيث إن المفهوم دا يبقى واضح بالنسبة لكل؛ لإن احنا النهارده بنطلع دا يعنى فى تقدير الجهات الرسمية، ولإزم يبقى فيه أساس متفق عليه، وإلا لما نبص نلاقى إن احنا بننقص ٧٠٠ مليون فى تغيير المفهوم، طبعا دى عملية كبيرة جدا.

وبعدين أنا فى تصورى إن برضه الواحد لما بيقول إن دى فى صورة قروض أو دى ديون بتتضم للدين العام؛ علشان يبقى المفهوم عندنا إن احنا بنعامل رأس المال المعاملة الجديرة به من ناحية الاهتمام برأس المال. يعنى النهارده إذا كنا إحنا مثلا واخدين من أوعية الإيداع وبنعتبر دى إنها مهياش ديون، طيب ماهى عليها التزامات، ومفروض إن رأس المال دا يعطينى عائد بنسب معينة بحيث إنه فى النهاية أقدر بس أقوم بالالتزامات المحمل بها هذا المال.

لأن إذا كنت أنا باخد مثلا من التأمينات الاجتماعية أموال فى السنة مبالغ أذ كذا، طب هيجى فى يوم من الأيام على التزامات بالنسبة للمستحقين لازم يدخل فيها فوائد ٤,٥٪، فهل القروض.. الدين دا يحقق لى ٤,٥٪ علشان أقدر أعطى التزاماتى من غير ما آخذ من الأصول بتاعتى؟! يعنى دى نقط الحقيقة.

وبعدين سواء فائض حاصلات أو سندات تعويض، دى مسجلة كدين. المفهوم بتاعها إذا كان عايز تصحيح، نعمل اجتماع ونشوف يعنى نرسى فيه على مفهوم محدد بحيث إن جميع أرقامنا تبقى متفقة اتفاق يعنى بحيث أنها متبقاش مختلف عليها.

القيسونى: هو طبعا مبقولش إن الجهاز جاب أرقام مهياش مسجلة فى جهات تانية، يعنى هو الجهاز بيستمد أرقامه من سواء من البنك المركزى أو من وزارة الاقتصاد أو من وزارة الخزانة، ولكن أنا يعنى كنت بأحاول أعطى تأويل اقتصادى لمعنى الدين ده. يعنى أنا بقول: إن من الـ ٢٧٠٠ دول فيهم ٢٠٠٠ بس هم فعلا زيادة فى المديونية، والـ ٢٠٠٠ دول يقابلهم من ناحية تانية زيادة كبيرة فى الأصول.. يعنى تزيد قطعا عن ٢٠٠٠ مليون جنيه.

## سرى للغاية

عبد الناصر: هو الحقيقة اللي يغطى الكلام اللي بيقول عليه حسين الشافعى حاجة قلناها فى يوم ما؛ لأن هو بيثير نقطة وجيهة.. طيب الفلوس دى هناخد الفلوس دى وبعدين؟! كنا قلنا: إن كل المشروعات لازم بتسد على كذا سنة وتتعمل لها فوائد ٢٪.. بتذكر هذا؟

القيسونى: أبوه.

عبد الناصر: وبهذا.. زى تمام ما كان عبود عايز يعمل مشروع يابيعمل اكتتاب يابياخذ قروض ولو حتى بضمان الحكومة بياخذ قروض من الخارج؛ وبهذا نضمن إن المشروع هيكون اقتصادى والمشروع يطلع مايتعملش مشروع مش اقتصادى لأنه عارف إنه على ١٠ سنين لازم حاسد أو يخليها حتى ١٥ سنة.

قلنا هذا الكلام: لازم يسد رأس المال بتاعه، ولكن أستسهل إن العملية دى متعملش وبدلا منها الأرباح آهى بتتاخد.. اللي هو فائض أرباح الشركات، ولكن رغم هذا مش كل الأرباح بتؤخذ، بعض الشركات لها أموال سائلة كثيرة موجودة.. ودا برضه بيرجعنا تانى الى عملية الـ system. الظاهر إن الغلط فى الموضوع كله عملية الـ system كلها.. يعنى لما نقعد نتناقش دلوقتى، إذا كنا هنتناقش زى ما بنقول نتناقش سنة ١٩٧٠ بنناقش سنة ٧٠ على إيه؟! وبهذا الـ system برضه الموضوع هيفلت من الإيدى كلها.

إيه الـ system اللي هنمشى به وإيه العملية؟ مع إيه؟ إزاي أولا نضمن الحقيقة إن احنا نمشى صح؟ إحنا قلنا الأول: إن احنا ماشيين نظام اشتراكى ولكن وقعدت أنا قلت: مفيش فرق بين الإدارة الرأسمالية والإدارة الاشتراكية، لكن إحنا فى عملياتنا عقدنا حاجات وسهلنا حاجات. تحطنا النهارده علشان نجابو على هذه الأسئلة، وبعدين أنا باعتبار إن أثناء المناقشات وضعت حلول عمياء كثيرة يعنى!

وأنا لو تذكروا مرة بعد ماجيت من يوغوسلافيا، وقلت: إن ماحدث يعمل مشروع إلا إذا راح للبنك، وممكن أى عدة ناس بيروحوا بهذا المشروع من counties متعددة وبعدين البنك بيدرس. وأظن بعت يادكتور قيسونى ناس أيامها من البنك المركزى درسوا العملية اللي كانت هناك، وقلت إزاي إنهم مقويين البنك المركزى.. البنك المركزى بيدرس اقتصاديات المشروع من الناحية الاقتصادية - مفيهاش مهندسين فيه اقتصاديين - بيدرسوا من الناحية الاقتصادية ويقولوا: هل هذا الموضوع سليم أو غير سليم؟ سليم.. يصدق عليه، غير سليم.. ما يصدق عليه.

## سرى للغاية

وطبعا ولما جاء هنا كارل، باعتقد إن على صبرى وزكريا قعدوا معاه واتكلموا معاه فى هذا الـ system، وكنا بنقول: إن احنا الـ system الـ system الـ system، وبعدين بعنتا بعثة من البنك المركزى وبعنتا بعثة من الناس وراحوا على أساس نحاول نعمل عملية بهذا الشكل. فيه مقاومات فيه استسهال للعملية، هو النهارده كل الكلام اللى بنتكلم عليه أنا باعتبر نتيجة الـ system.

القيسونى: هو بس تغيير الـ system يمكن يؤدى الى حسن الرقابة على المشروعات والتأكد من أنها تحقق من الأهداف بتاعتها، ولكن مش هيودى الى تخفيض المديونية.

عبد الناصر: لأ.. لأ.. أنا ما تكلمتش لكن لأ.. قد يؤدى الى عدم زيادة المديونية؛ لأن مكناش بنقعد نقرر ما هو زيادة المديونية اللى انت كنت بتيجى تقول لنا عليه؟ إحنا كنا بنضاهى..

القيسونى: بس ما كان فيه عجز الميزانية الجارية.. يعنى الميزانية الجارية نفسها كان فيها عجز فكنا كل الاستثمارات بالتالى بنمولها بالقروض.

عبد الناصر: آه.. ما أنا عارف هذا طبعا كل الاستثمارات بنمولها، ولكن إحنا مشينا فى سلك.. أنا أول ميزانية اشتغلت فيها بعد الثورة مع عبد الجليل العمرى كانت ٢٠٠ مليون جنيه.. كل الميزانية ٢٠٠ مليون. وقعدنا يومها وكنا بنتكلم تكلمنا فى عمليات تخفيض، وكان موجود جمال سالم وكان عنده يومها ميزانية كام النهارده.. الميزانية كام؟

القيسونى: بالألف.

عبد الناصر: وتطورنا الحقيقة بدون خطة. أنا مش باحملك إنت المسئولية فى هذا الموضوع، برضه القوات المسلحة العملية الحقيقة فوق قدرتنا، لكن ما حدش اتكلم وكل الناس كانوا بيثوفوا الميزانية! أى واحد بيتكلم النهارده.. ما حدش اتكلم قبل كده يعنى أنا متكلمتش.. أنا متكلمتش ليه! ما حدش جالى قال لى: إن فيه مشكلة، ما حدش جالى قال لى: بلاش كذا، ما حدش جه قال: لأ.. يعنى إيه وأنا حانتكلم إزاي؟! أنا راجل لا أنا اقتصادى ولا مطلوب منى أبقى اقتصادى وعسكرى ومهندس وخطيب وسياسى وبأشتغل والكلام دا كله.. مش ممكن.. ممكن يعنى! فيه حاجات معينة لكن بالنسبة للعمليات دى مش ممكن، فى الزراعة معرفش رتب القطن لما سيد مرعى بيتكلم لغاية دلوقتى والله بأسأل



## سرى للغاية

حسين الشافعى بقول له: إنت فاهم كلام سيد مرعى ده؟! قال لى: آه.. استغريت أنا من الحكاية دى! (ضحك)

الشافعى: بقالى مدة باروح اللجنة الاقتصادية. (ضحك)

أصوات: (ضحك)

عبد الناصر: لأ.. بعد ما تخلص جلسة ونوريك إن العملية لا يمكن فاهم ولا حاجة! (ضحك)

أصوات: (ضحك)

عبد الناصر: قلت له: فاهم فى الرتب اللى بيتكلموا فيها دى.. عملية الرتب والأسماء.. آهو حسين الشافعى حافظ قوانين أنا مش حافظ نمرة كذا.

اللى أنا بقوله إيه: إن كل الناس الموجودين النهارده هنا - وأنا برضه فى اختياري للأسماء أنا اخترت ناس مددهم طويلة - ماحدث جه قال فيه حرف!  
وزى ماقلت لكم فى الجلسة اللى فاتت: أول مرة فى سنة ١٩٦٥ بعد زكريا ما اتعين بستة أشهر، جاء قال لى: إن العملية كذا وعايزين ناخذ الحل كان إجراءات عنيفة كثيرة.. دى المناسبة اللى حصل فيها الكلام. ليه بقى؟ لما بنيجى نعمل ميزانية وبيتقال والله آهو الاستثمار وبتاع؟ طيب عايزين استثمار.. لا ممكن نعمل الاستثمار دا على عجز. كويس، (ضحك) ماحدث جه بقى من كل اللى قاعدين هنا وقال: لأ.. منعملش استثمار على عجز.. ولا واحد!

القيسونى: هو أنا يخيل لى يافندم إن احنا كنا عارفين إحنا ماشين إزاي.

عبد الناصر: آه.. أنا عارف إن احنا كنا بنعمل استثمار بالعجز.

القيسونى: آه.. يعنى يمكن سنة ١٩٦٢ إحنا خفضنا العملة، يعنى كان بعد محصول القطن بتاع ٦٢/٦١ كانت ابتدت تظهر الصعوبات وبعدين حصل تخفيض العملة، وحصل أول اتفاق مع صندوق النقد الدولى والمطالبة بخفض التمويل بالعجز، ولكن إحنا قبلنا بإرادتنا أننا نستمر فى العملية ونمول بعجز علشان مانبطأش حركة التنمية. وكان فى

## سرى للغاية

تقديرنا إن التمويل دا بالعجز هيترتب عليه بعد فترة إن هيحصل فائض وإن هذا الفائض سيغطى العجز.

يعنى مكناش بنعمل حاجات من غير مانعرف، يعنى إحنا كنا عارفين بالضبط ولكن جاءت ظروف تانية؛ يعنى جه اليمن والتحول الاشتراكى والزيادة فى الاستهلاك وزيادة الأجور والمرتبات.. دى كلها كانت عوامل حالت دون إننا نصل الى المرحلة اللى نسدد فيها التمويل بالعجز. يعنى مفيش شك الى أننا إذا كنا وفرنا من المصروفات الإضافية اللى حصلت بعد سنة ١٩٦٢ - دى مثلا ٤٠٠، ٥٠٠ مليون جنيه - كان يبقى الموقف النهارده أحسن من كده مئات المرات ٤٠٠، ٥٠٠ مليون جنيه.

ولكن إحنا عارفين وأنا لغاية دلوقتى بقول: برضه يعنى - أنا كاقصادى - لست متأسف أننا اقترضنا كل هذه المبالغ؛ لأننا قصاد هذه المبالغ أقمنا حاجات كثيرة.. عملنا حاجات كثيرة وأمنا وجبنا من الخارج يعنى أمنا الملكيات الأجنبية. طبعا التأميم الداخلى دى عملية نقل ملكية داخلية، ولكن يعنى أخذنا حاجات كانت ملك الأجانب، وبعدين أقمنا حاجات يعنى كثيرة برضه داخليا، وكل الحاجات دى بتقابلها فلوس.. دى يعنى مش المسألة أننا مكناش عارفين يعنى إحنا كنا عارفين.

عبد الناصر: مش قوى.. ما أنا بقول كده!

الشافعى: هو الحقيقة برضه يعنى عايزين نعرف إمتى يبقى حجم الدين خطر؟ أنا معرفش والله. يعنى صحيح إحنا بنسجل وبنجيب المعلومات دى فعلا من مصادر الدولة المختلفة يعنى دى مش اختراع من عندنا، ولكن لأول مرة حجم الديون دى يتجمع ويظهر ويتلم ويتحط أمام المسئولين، يعنى أول مرة نجمع هذه البيانات على مستوى الدولة ونقول يعنى إذا كان هذه البيانات فيها تصحيح، برضه نحب يعنى نناقش هذه البيانات ونرسى على..

عبد الناصر: طبعا فى الـ system برضه كل واحد كان بيعمل أى قرض عايز يعمله ما حدش.. وكانت وزارة الاقتصاد معندهاش بيانات لمدة قريبة.. وزارة الاقتصاد ولا التخطيط ولا حد كان عنده بيانات عن القروض.

القيسونى: إحنا هنا لغاية سنة ١٩٦٤ يعنى لغاية ٦٣ ونصف ١٩٦٤، كانت البيانات غير متاحة.. القروض الخارجية يعنى غير متاحة بالتفصيل.

## سرى للغاية

عبد الناصر: دلوقتى اللي أبص ألاقى الاتحاد السوفيتى بيقول إنت.. وعازيز يعمل اتفاقية! سكينتشكوف.. سكينتشكوف فى سوريا.. سكينتشكوف هو اللي هنا واحد هو اللي بيعمل كل العمليات الاقتصادية الخارجية.

القيسونى: برضه أنا بقول: إن احنا فى بداية الخطة وفى بداية التوسع الاقتصادى بتاعنا يعنى إحنا شجعنا دا بإرادتنا برضه.

عبد الناصر: آه.

القيسونى: يعنى إحنا قلنا القطاعات تروح وتقترض؛ لأننا كنا مستعجلين على عملية التنمية كنا معتبرين دا تحدى وبعدين دلوقتى يعنى إحنا بنراجع نفسنا.. فيعنى سيادتك بتقول الـ system، يعنى ما هو الـ system بقى أنا يخيل لى دلوقتى بعد العملية الأولانية دى إننا لازم يعنى يبقى قواعد محددة معينة نمشى على أساسها سواء فى القروض الداخلية أو الخارجية.

وبعدين النقطة اللي بيثيرها السيد حسين الشافعى، يعنى إمتى الدين يصل لحدود الخطر يعنى؟ هو الدين الداخلى بيعتبر transfer problem يعنى مسألة تحويل من دائن الى مدين من داخل الدولة، ولكن مايقاش يصل الى مرحلة الخطورة. الدين الداخلى أما يؤدى الى زيادة الإنفاق فوق الموارد المتاحة، يعنى إذا كنت بأقترض من البنوك وبأمول إنفاق من غير ما يقابله موارد حقيقية.. دا بيتدى بقى عملية التضخم فى الارتفاع فى الأسعار والسوق السوداء الى آخره.

الشافعى: لأنها أعطت إحساس يعنى غير مباشر باستسهال القروض الداخلية وبقت يعنى الحرص على المال العام، يعنى يمكن كان لها انعكاسات ولو نفسية بالنسبة للناس اللي بتباشر هذه العمليات.. لأن صحيح فلوس مقدور عليها..

القيسونى: وأنا أتفق مع سيادتك إن يعنى يمكن سهولة عملية الاقتراض، أوجدت حالة نفسية فعلا إن دى مسألة بسيطة.. يعنى التمويل مسألة بسيطة بقى يعنى ميهمش مدى الإنفاق. ويعنى حصل اللي بيشير اليه الأخ على فى الجلسة اللي فاتت بتاعة سور الصين العظيم وبتاع، يعنى فى جهات مختلفة حصل توسع كان ممكن الضغط فيه. لكن بالنسبة للقروض الخارجى هو اللي بيتمثل صعوبة، بالنسبة للقروض الخارجية اللي احنا

## سرى للغاية

بنبقى ملتزمين أمام جهات خارجية تخرج عن حدود سلطتنا وإرادتنا وملتزم مقابلها بالسداد فى أوقات معينة. ده يبقى إذا كان الدين أو خدمة الدين بما فى ذلك الأقساط والفوائد تزيد عن الفائض فى الميزان الحسابى، دى اللى بنواجه فيها صعوبة.

فيعى إحنا بنعمل برضه دراسة على الدين الخارجى لمدة السنين اللى جاية. يعنى هو باين مثلا إن أهم الدائنين بالنسبة لنا هم الاتحاد السوفيتى أولا وبعدين الكويت رغم الاعتقاد بأن الدول العربية مفيش احتمال رؤوس أموال تيجى منها، ولكن ظهر من الكشوف إن الكويت هى تانى دائن بالنسبة لنا. الديون دى سواء الفضل لسيادتك أو للأخ أنور يعنى فى الحصول عليها يعنى تزيد عن ١١٠ مليون جنيه.

وبعدين المؤسسات الدولية، وبصفة خاصة صندوق النقد الدولى البنك الدولى الى حد أقل من.. دول الثلاثة الكبار. وبعدين الولايات المتحدة الأمريكية ٥٢ مليون جنيه، ألمانيا الغربية ٨٦، المملكة المتحدة ٣٦، إيطاليا ٧٣، بس دول بقى الكبار، الباقي بقى بعد كده مبالغ صغيرة فى حدود.

مجموع العملات الحرة ٥٣٣ مليون جنيه؛ دا شامل الالتزامات العامة، والالتزامات الموردين، والالتزامات التسهيلات المصرفية، والالتزامات البنوك التجارية، والالتزامات الموردين للشركات.

وبعدين فى بند الاتفاقيات، الاتحاد السوفيتى ١٧٧ مليون جنيه والباقي بقى يعنى ألمانيا الشرقية ٧ والمجر ٤ وتشيكوسلوفاكيا ١٠.

مخى الدين: ٥٠٠ زيهم تقريبا.

القيسونى: ٢١٧.

مخى الدين: بس؟

القيسونى: ٢١٧ على حسب التعريف بتاع وزارة الاقتصاد تبقى ٤٤١، اللى هى شاملة العقود بالكامل زائد الفوائد بتاعتها. ولكن يعنى برضه أنا بقول: فيه مثلا زى الاتفاق الاقتصادى بتاع ١٩٦٤، محسوب على إنه ١٠٧ مليون جنيه بينما إن الآلات التى وصلت ١٧ مليون جنيه، السد العالى محسوب على إنه ١٤٢ مليون جنيه بينما إن الآلات والمعدات التى وصلت يعنى حوالى ١٠٠ مليون جنيه.

## سرى للغاية

محي الدين: يعنى هتفرق سنة ولا سنتين علشان العقود دى حانتنفذ؛ يعنى علشان الفرق دا يتحط بين وزارة الاقتصاد وبين البنك، وعقد بيتمضى معناه الـ equipment هتيجى.

القيسونى: يصح.. يتوقف يعنى على سرعة التنفيذ يعنى مثلا اتفاق ٦٤..

عبد الناصر: وجهزوا المخازن بقى الـ equipment جاهز! (ضحك) جاية.. جاية.. (ضحك)

القيسونى: أيوه بس الدخل بيزيد فى نفس الوقت، وهل هنزود الفوائد ولا مش هنزود؟ يعنى هل لما بنحسب السندات المحلية بنزود عليها الفوائد ولا مانزودش؟

عبد الناصر: هتجهز مخازن فين ياعزيز؟

صدقى: ماحدش عارف.

عبد الناصر: فى حلوان.. تأجر حطة وتخزن فيها.

صدقى: هو العقود الحقيقة مابدأتش التنفيذ، يعنى الإجراء التنفيذى للعقود زى مثلا المجمع بتاع حلوان من سنة ١٩٦٤، ولكن لسه مفيش ولا حاجة.. يعنى فيه العقد التنفيذى بقى ماتوقعش. وبعدين الحقيقة يعنى يوم مايبوقع بنقول: هيستحق الأقساط فى تاريخ معين؛ ما هو بيقابلها سداد معين كمان، ما إحنا بنسدد من الالتزامات اللي علينا يعنى زى ما لو نفذت هذه العقود هتسدد بالكامل.. زى ما السيد زكريا محي الدين بيطلب إنها تحسب بالكامل. على مدى السنين اللي هتسدد فيها بالكامل، بيحصل سداد أيضا مقابلها.. منقدرش نأخذ العبء ومنحسب السداد! يعنى برضه لوحسبنا فى السنين الماضية كم مليون سدناها وخصوصا فى اللي هى التسهيلات المصرفية، أظن إحنا سدنا مبلغ كبير.

عبد الناصر: هو والله إحنا برضه يعنى هدفى من هذا الاجتماع أساسا، إن الواحد مايقاش تحت impression بصورة سوداء أو تحت impression بصورة بيضاء علشان الواحد يعرف يشتغل، لكن ييجى واحد يسود له الصورة وييجى واحد يبيض له الصورة متمشيش العملية أبدا؛ لأن نبقى ماالحناش ماشيين صح!

## سرى للغاية

المطلوب الحقيقة إن احنا نعرف ما هى الحقيقة؟ يعنى بيفرق دلوقتى فى الديون الخارجية مبلغ كبير جدا اللي بنتكلم عليه، دلوقتى الكلام اللي أنا دلوقتى فاهمه إن علينا ديون خارجية ٧٥٠ مليون، مش كده؟!

البشرى: ألف أظن يافندم.. لأ.. دا الحر ٥٠٠ مليون!

الشافعى: وشوية، وبينقص ٢٠٠ يعنى ٤٥٠.

عبد الناصر: فى الوقت اللي بيتقال علينا ديون خارجية ١٢٠٠ ولأ بيتقال علينا مش فاهم إيه! وميزان المدفوعات إيه! طبعا لما نعرف الحقيقة الواحد بيقدر يحلل. آهو مثلا صندوق النقد الدولي، كلامك إمبارح معايا على الصندوق الدولي بنسدد بنقدر بعد خمس سنين بنؤجل الدين، عايز أعرف أولى إيه وآخري إيه؟ برضه بنقدر مثلا نلقى العملية بهذا الشكل بدل الواحد ماهو قاعد حزين وقاعد يمكن بصورة سودة خالص وزكريا كل ما أشوفه يقول لى مفيش فايده! (ضحك)

أصوات: (ضحك)

عبد الناصر: الواحد قاعد كده شايف اليهود على شرق القناة، والحالة الاقتصادية مش فاهم إيه والمصانع واقفة والإنتاجية مش فاهم إيه! بيبقى الواحد الحقيقة يعنى فى حالة قرف.. يعنى قرف عام! وبعدين القرف العام دا آخرته إيه؟! فالحقيقة الغرض إن احنا برضه نعرف ماهى المشكلة وما هو حلها.. مش كده! يقوم الواحد يقدر يحسب حسبته ويعرف أوله من آخره، لكن اللي حاصل الحقيقة الواحد ماهو عارف أولها إيه وآخرها إيه.. ولأ إيه يادكتور!

القيسونى: هو يمكن الاتهامات اللي حصلت..

عبد الناصر: يعنى حسين قبل الجلسة اللي فاتت كلمنى فى التليفون وقال لى: التقرير! قلت له: تعالى.. هات التقرير وتعالى اتكلم. الكلام بتاع التخطيط كلام، وكلام بتاع الخزانة كلام، وكلام الجهاز المركزى كلام! عايزين نعرف إيه الحقيقة؟!

## سرى للغاية

القيسونى: هو يمكن الحاجة اللى بنتفق فيها كلنا هى إن الـ bottle neck اللى أمامنا فى السنين الجاية هى النقد الأجنبى؛ يعنى إحنا لازم نتبع سياسة تساعد على فتح الـ bottle neck دى بطريقة أو بأخرى. أولاً الالتزامات اللى علينا..

عبد الناصر: فتح الـ bottle neck هيفتلف؛ إذا كنت هتقول لى: ١٥٠٠ مليون يعنى هدف كل سنة ٢٠٠ مليون ديون والتزامات غير تسهيلات الموردين وغير التسهيلات المصرفية وغير العمليات اللى بهذا الشكل. بأعرف بقول: مفيش فائدة، هدف منين وهعمل إيه وأسوى إيه؟! يعنى الحل الوحيد بقى إنى أروح أتفق مع الأمريكان، وأقول لهم: إعطوني معونة.. ببقى دا الحل الوحيد اللى أمامى! مش كده؟! إذا كانت مفيش فائدة ببقى لازم أروح للأمريكان أقول لهم: فى عرضكم أنا يعنى راجل مستعد - زى تايلاند - وأشتغل اللى إنتو عايزينه.. لأن دا الحل السياسى الوحيد بالنسبة لبلدى!

محي الدين: لأ.. هم مفلسين هم الآخرين يعنى.. مفيش.. (ضحك)

عبد الناصر: ومعنى هذا إيه؟! الموضوع من دا يطلع من هذا على السياسة الخارجية على العلاقات الدولية.. ونتكلم فى الموضوع الاقتصادى يطلع الموضوع الاقتصادى على السياسة الخارجية على العلاقات الدولية على موقفنا إيه؟ هل هنتشغل عربى ولا مصرى ولا هنتشغل مختلط؟! ماحدث على فكرة اعترض قبل كده على شغل عربى؛ أهم قاعدين.. أيام اليمن كل الناس جاءوا وكل الناس قرروا، وكمال حسين بيقلوا إنه كان معارض! كمال حسين كان موجود وبغدادى كان موجود وكل الناس.. موضوع اليمن، ولو إن اللى عمل قمه وغرقنا أنور السادات! (ضحك)

أصوات: (ضحك)

عبد الناصر: الكل وافق على دخول موضوع اليمن، ولكن دخلنا تحت أى impression إن هنودى طيارة تسقط شوية قتابل هيجروا اليمنيين، وحوالى نبعث لنا ألف ألفين عسكرى! مش كده لم يطلع صوت ضد عملية اليمن، وقلنا: إحنا غلطنا فى تقديرنا للموقف.. غلطنا فى حساباتنا كلها. لكن ماحدث.. وكمال حسين موافق وبغدادى موافق وكل الناس موافقة. وبعد كده فى مجلس الرئاسة اتعمل مجلس اسمه مجلس الدفاع القومى كان فيه زكريا وبغدادى وكمال حسين.. مش كده؟!!

عبد الناصر: ٦٢، علشان إدارة القوات المسلحة وإدارة موضوع اليمن هيطلع الكلام دا فى المحاكمة - متهيألى المحاكمة هتطلع كل الكلام ده. وأنا جبت على نور الدين وقعدت معاه وحكيت له الحكاية كلها من أولها لآخرها، وأعطيته القوانين والعملية؛ لأن غصبا عن الدنيا لأن الكلام عن الحرية والكلام على الديمقراطية الموجود فى المحكمة هيجرر مواضع كثير قوى. قصدى إيه؟ قصدى فى الكلام النهارده لما نتكلم فى الموضوع الاقتصادى، معنى هذا الموضوع الاقتصادى دا بيجررنا الى الموضوع السياسى وبيجررنا الى سياستنا إيه وعمليتنا إيه ومش فاهم إيه والكلام ده. ماهو إذا كان الوضع بقى بهذا الشكل فيبقى إيه مفيش فائدة غير إن احنا عايزين معونة أجنبية من حد علشان نقيل عثرتنا.

فيه فرق هنا بين التزاماتى تبقى ٢٠٠ مليون جنيه، مثلا لما تقول لى التزاماتك ٢٠٠ مليون جنيه بأقعد أنا وأقول: والله بأبعت لجونسون وأبعت أجيب ناس من أمريكا وبتاع! وأنا بعت جبت ناس وبعث لجونسون واتصلت به وكتبت له جواب وكتب لى ومكانش عيب فى السياسة أبدا إنى أعمل كل هذا الكلام، بس هأمشى بقى لغاية فين؟ هخليها زى تايلند؟! وهو بعت لى جواب بعت لى جواب من قيمة ١٠ أيام وبعث لى تانى.

وباعتبر دا صح، لكن الى أى مدى الواحد يمشى؟ إذا كان مفيش فائدة يبقى بنقول لهم: والله يعنى على أساس الـ ٢٠٠ مليون جنيه والالتزامات اللى هى ٢٠٠ مليون جنيه.. نشتغل على هذا الأساس، لكن لما تقول لى بقى: إن التزاماتى ٥٠ مليون جنيه ٦٠ مليون جنيه أو ٧٠ مليون جنيه أو ١٠٠ مليون، إذا كانت التزاماتى يعنى فيه وضع تانى؛ مثلا أنا باعتبار إن أنا مثلا مآدفعش لألأمريكان أأدفع ولا لألمانيا الغربية بأدفع ولا للكويت بأدفع! يايجدولوا يامآدفعش وبأعرف أولى إيه وأخرى إيه؟ وبيؤثر على وأتعامل، مآعدا الدول.. آجى انجلترا على ٤ مليون ولا ٣٠ بأشتغل معاهم وفرنسا بأشتغل معاهم وإيطاليا بأشتغل معاهم، والباقيين مآشتغلنش معاهم.. لا بأدفع ولا بأعمل!

لكن برضه بقول: الـ system؛ لأن برضه إحنا النهارده عايزين ديون وعايزين قروض من هؤلاء الناس علشان نمول عمليات القمح وناخده على سنتين ثلاثة، وبنحط عمليات استهلاكية جديدة. وقصدى الحقيقة إن الوضع أمامنا لازم يتضح؛ لأن دا بيبين الى مدى كبير إيه السياسة اللى احنا بنتبعها؟



## سرى للغاية

طبعاً إحنا النهارده بقول: إحنا السياسة مضروبين، وسياستنا.. الثلاث دول التي تقدر تعمل علينا ضغط هي الكويت والسعودية وليبيا؛ فأحنا نقعد ساكتين لغاية منحاول نحل المشكلة اللي احنا موجودين فيها بهذا الحل أو ذاك.

لكن الغرض من هذه الاجتماعات هو أن نعرف ماهى الحقيقة، علشان إذا عرفنا إيه الحقيقة بيؤثر الحقيقة على شغلنا السياسى بيؤثر على عملنا الاجتماعى وبيؤثر على.. مش الغرض إن أنا الحقيقة أقعد أبحث الخطة.

محي الدين: هو يعنى طبعا أنا بالذات عاوز أقول: مفيش حد قلبه على الثانى أبدا.. على حد تانى، كل واحد قلبه على نفسه.. يعنى أى بلد بتدور على نفسها وتشوف مصلحتها فين. وأنا فى تقديرى إن مفيش حد ببساعد التانى إلا مقابل برضه مصلحة معينة أو ناحية مادية معينة.

فيعنى إحنا لازم كل تفكيرنا من خلال هذه الجلسات، إزاي إحنا نصلح حالنا؟ وإزاي نقول للرئيس إيه ال system اللي يمكننا من أولاً كنقطة بداية. وبعدين نشوف إيه المساعدات اللي ممكن بتجينا نتيجة الخط السياسى اللي بنتبعه، ولو إن يعنى فيه أمل إن الأوضاع الدولية الحالية لا تسمح كثيراً بأن تيجى معونات كما كانت تجى فى خمس سنين أو من عشر سنين فانتت لظروف العالم كله. كل واحد دلوقتى من الدول الكبرى حريص على إنه هو بيعطى بالقدر اللي بيقدر يأخذ به مقابل مادي، ويمكن هم فى تجاربهم الأولى كانوا مندفعين، وكان فيه صراع دولى موجود كان يدفعهم إنهم يضحوا بتضحيات معينة علشان مقابل أوضاع استراتيجية. ولكن النهارده حتى فى ظروف التعايش السلمى الموجود بين الدول المختلفة العالمية، يمكن يعنى من هذا المدخل هيكون يعنى صعب إنه يخلصنا من المشكلة إذا كان هناك مشكلة موجودة.

أنا الحقيقة بدى أعلق على كلام الدكتور القيسونى بالنسبة لتفسيره للأرقام الموجودة؛ لأن هو طبعا بيحاول يفسر إنه فى الديون الداخلية مهياش من الخطورة، وإن احنا ممكن أن نواجه هذا الموقف بطريقة أو أخرى. وأنا أتفق معاه فى حدود إن هذه الديون الداخلية لا شك إن لها انعكاس معين على الدين الخارجى، فهو فى الحقيقة اللي يهمننا من الرقم ٢٠٠٠ أو ٢٧٠٠ أو اللي هو مجموع المديونية هو الجزء الخاص بمديونيتنا مع العالم الخارجى.

وده كان محل بحث من مدة، وأنا بالذات لما جيت فى سنة ١٩٦٥ أول حاجة عملتها ابتديت أجمع معلومات عن هذا الموضوع. يعنى الرئيس بيقول لى: بعد ٦ شهور أنت جيت لى وأعطيتنى صورة معينة، بصراحة أنا كنت فى خلال هذه الستة شهور أنا

## سرى للغاية

كنت بأجمع أرقام. أنا عملت فى لجنة الخطة لجنة من البنك المركزى بمعرفة الدكتور القيسونى ووزارة الاقتصاد؛ علشان يجمع لى بيانات عن إيه مديونيتنا إيه حقيقة الموقف؟ وحتى كذا شهر مرت فى عمر الوزارة ولم تصل هذه المعلومات، كانت كلها معلومات جزء منها حقيقى ومؤكد وجزء منها تقديرى ولا كان. لازالت اللجنة بتشتغل يمكن لغاية الوزارة ما انتهت مدتها، واللجنة دى يمكن كانت بتشتغل ولسه مكانتش مؤكدة بالنسبة لمعلومات معينة والأرقام معينة.

أنا عاوز أقول: إن مع اختلاف المعايير، الرئيس بيطلب الوصول للحقيقة أولاً.. يعنى مع اختلاف التعاريف بين وزارة الاقتصاد وبين وزارة التخطيط فى الكلام اللى اتقال. أنا بقول: إن الموقف مبقولش موقف تشاؤم أو موقف أسود أو صورة لونها أسود لآ.. إنما يجب إن احنا نواجهها بجدية كافية وحذر كافي بالنسبة لطريق عملنا مستقبلاً. لما النهارده فى السنين القادمة، بتيجى وزارة الاقتصاد ويتفق معاها التخطيط وكل الأجهزة وبيؤكدوا إن أرقام المديونية هي ١٣٥، ١٣٠، ١٥٠، دا غير المتأخرات اللى ذكرها الدكتور القيسونى، كما ذكر الدكتور حسن زكى قبل كده فى إن احنا علينا مديونية ٣٣٠ مليون جنيه فى العام القادم.. كما ذكر يعنى بالنسبة للمتأخرات ذكر هذا. هذه الأرقام بغض النظر عن مع مجموع السنين هتكون ٧٠٠ ولا ٩٠٠ ولا ١٠٠٠ أو حاجة.. يعنى تستدعى إن احنا نقف عندها شوية.

يعنى النهارده لما أشوف ميزان المدفوعات بتاعنا، بأجد إن أنا استيرادى على أد التصدير بتاعى ويفضل لى ١٣٥ مليون جنيه حسبتهم - يعنى أنا باخد الموضوع بمنتهى البساطة وبدون تشاؤم - وبقول: إن هي دى الطريقة اللى احنا ممكن بالعمل الجدى إن احنا نقدر نواجه الموقف.

يعنى مفيش أبدا حسب تصورى إن حد يعنى قاعد هيبلط فى الخط وبيأس من الموقف، مطلقاً يعنى.. مسألة اليأس دى مخرجها من تفكيرنا، ولكن بنيجى هنا فى السنين القادمة بنقول: طيب إذا كان أنا استيرادى ٤٠٠ وتصديرى ٤٠٠ طيب أنا هسدد الـ ١٣٥.. طيب بنقول يعنى إعادة تقسيط بتاع الجدولة. طيب إحنا حاولنا هذه المحاولة فى سنة ١٩٦٥ وقعدوا تعبونا سنتين، وقسطوا لنا على خمس سنين واشترطوا شروط وبتاع.. يعنى فيه صعوبات قطعاً فى عملية الجدولة أو مايعطيكش.. أو يعطيك فى حدود لا تتمشى مع آمالنا بالنسبة للخطة الموضوعية.. الخطة الموضوعية علشان تصلح الموقف. فهل هم هيساعدونى فى تنفيذ هذه الخطة؟ بيساعدونى إذا أنا ساعدتهم فى تسديد جزء من التزاماتى السنوية الموجودة فى الجدول المعترف به.

## سرى للغاية

فاذا كان أنا عندى ١٣٥، وبنناقش فيهم وبننقيهم وبيوصلوا ١٠٠ مليون جنيه مثلا فى السنة، طيب أنا هسدد الـ ١٠٠ إزاي؟ ماهى الناس دول لازم أعطيهم حاجة. يعنى والله خذ آدى ٢٠ آدى ٣٠ مليون جنيه آدى ٤٠ مليون جنيه وخلي لى الـ ٦٠ قسطهم لى على ١٠ سنين. كل واحد ممكن يعنى فى الحياة العادية كان زمان قبل الثورة بين الأفراد كانت بتمشى العملية بهذا الشكل علشان حتى الناس تضمن أموالها، وطبعا سعر الفائدة ماشى على كل حال يعنى مفيش خسارة عليهم فى هذا.

فهى دى نقطة البداية فعلا الحقيقة، إزاي نقدر يكون فيه وفر معين فى ميزان المدفوعات الخارجى أد ٤٠، ٥٠ مليون جنيه أقدر عن طريقهم أقسط المديونية الخارجية اللى هى معروفة فى السنين القريبة القادمة. مجموعها بنختلف عليه بأنها مثلا ٧٠٠ أو ٩٠٠ أو ١٠٠٠ أو كده، أنا مبعترش دا هو الموضوع لأن احنا لما هنجى هنا نقاش مرحلة الانتقال ما بين النهارده وسنة ١٩٧٠ اللى هى بداية الخطة الجديدة اللى حاول يشرحها الدكتور القيسونى، أنا مش عارف إزاي هخرج نفسى من الموقف الحالى؟! ما هو أنا لازم أخرج من هذا علشان أقدر أنطلق من سنة ٧٠. لو معرفتش أخرج فى خلال السنين دول، أنا بقول: إن الخطة لن تمارس، ونزبه طبعا هو فى مذكرته اللى سيقدمها مبين طبعا بعض معانى بهذا الشكل وموضحها.

ده معناه إيه؟ معناه إن احنا بنضغط على نفسنا، إزاي؟ نشوف إيه اللى ممكن يتعمل علشان نضغط على نفسنا سنتين ثلاثة؛ بحيث يمكن إن احنا نوفر مبلغ - وفر معين فى المعاملات الخارجية - يمكننا من إن احنا نمشى فى طريقنا. أنا مع السيد الرئيس فى إنه بنرجع برضه فى النهاية نقول الـ system والـ system؛ دا لاشك فى إنه هيمكن من المراقبة والمتابعة، ويوقف سيل الإهمال الحالى والتضخم الحالى وزيادة المديونية الحالية؛ على الأقل يوقفها وبعدين هيحسنها.. عملية المتابعة بالذات هتحسن الموقف لاشك فى هذا.

### ارتباط السياسة الخارجية بالسياسة الداخلية:

يعنى أيضا واضح أماننا، إحنا كلنا وافقنا على حرب اليمن وحصل اجتماع للجميع على صورة معينة وتقدير موقف معين. ثورة قامت سنة ١٩٦٢ وقالوا: إنها محتاجة الى مساعدة صغيرة. حصل اجتماع وحصل كلام الاخوان اللى كان عندهم معلومات شرحوا هذه الجوانب؛ وبناء على هذه المعلومات تقرر إن احنا نساعد الناس دول فى حدود ضيقة. بعد كده المسألة تطورت.. تطور هذه المسألة يعنى هل كان فى إيدينا؟ مكانش فى إيدينا.. العملية الحقيقة حصل إنها تقريبا خرجت من إيدينا!

## سرى للغاية

يعنى دخل الموضوع فى دور سياستنا العربية، وبالنسبة للوضع العربى كان فيه صعوبات كبيرة جدا إن احنا بناخد بعضنا ونسيب.. نترك اليمن ونمشى فجأة مرة واحدة كده.. كان فيه صعوبات أنا بأعترف بهذا. أخذنا تجربة كبيرة جدا من اليمن وغير اليمن بالنسبة لارتباطات السياسة الخارجية على الأوضاع الداخلية، وهل صحيح إذا كان الوضع بصورة معينة دا يدفعنا إن احنا نختط لنفسنا سياسة معينة بالنسبة للمستقبل فى الخارج؟

يعنى ممكن إننا نتكلم فى هذا الموضوع، ولكن أنا معنديش.. أنا رأيت الشخصى إن مفيش أمل كبير فى إنه يأتى لنا سيل من المعونات كما جاءت فى الماضى من الخارج.

عبد الناصر: إحنا مجالناش سيل!

محي الدين: لأ.. جالنا.

عبد الناصر: فين؟

محي الدين: برضه.. يعنى نعتبر أحد يمكن من أكبر البلاد اللي جالها معونات من أمريكا كانت مصر.

سليمان: جالنا من أمريكا بس على الأقل ٤٠٠ مليون جنيه.

محي الدين: مكتوبة فى التسجيلات كلها ٤٠٠ جالنا.

عبد الناصر: بتوع القمح؟

سليمان: لأ.. فى صور مختلفة.

محي الدين: دول بيقلوا ٩٠٠!

## سرى للغاية

سليمان: هم يقولوا مليار دولار.. وأظن الرقم دا قريب جدا من الحقيقة.

محي الدين: اللي هو المليار؟

سليمان: أيوه اللي هو ٤٥٠ مليون جنيهه فى صورة معونة فنية، وفى صورة حاصلات زراعية وفى صورة Care - والصورة كلها أظن واضحة - دا غير القروض طويلة الأجل اللي أعطوها لنا علشان محطة جنوب القاهرة وعلشان مصنع الورق وعلشان السكة الحديد.

محي الدين: فهو الحقيقة يعنى يمكن الشئ اللي فى تقديري أنا اللي محتاج الى دراسة، هو نظرتنا الى سياستنا العربية؛ لأن دا الحقيقة المجال اللي احنا عايشين فيه، واللى أسواقنا برضه مرتبطة به بغض النظر عن إنه هل ممكن بييجى استثمار عربى لداخل مصر أو ميجيش. ولكن أنا النهارده لما مثلا يعنى فى ارتباط الداخل والخارج، أنا النهارده كدولة بابنيها على أن تكون دولة صناعية، طيب ما أنا يعنى الأسواق بتاعتى هتكون فين غير أنها هروح أسوق فى البلاد العربية؛ لأنها برضه بتكارمنى وبتساعدنى فى المراحل الأولى من التصنيع فى أنى أقدر أسوق بضاعتى. طبعا لما بيبقى فيه سياسة عربية من نوع آخر قطعاً هم هيقفلوا علينا الأسواق وكذا وكذا.. يعنى المثل دا يدى فكرة عن ارتباط السياسة الخارجية بالأوضاع الداخلية.

صبرى: وأنا برضه هركز كلامى على المديونية بالنسبة للخارج، ولو إن طبعا المديونية بالنسبة للداخل لها تأثيرها - مفيش شك فى هذا - ومتقدرش يعنى نعمل لها الـ limitation بالكامل. إنما سواء أخذنا الرقم التفسيري بتاع وزارة الاقتصاد أو التفسيري الجديد الذى أعطاه الدكتور القيسونى دلوقتى؛ ففى كلتا الحالتين هذا الرقم لو حسبناه على الدخل القومى بنجده بالنسبة للدخل القومى المتزايد بنجده.. أولاً: لا يمثل رقم كبير جدا. وإذا حسبناه من ناحية ثانية، على أساس دولة نامية بتتمى نفسها وبتأخذ قروض من الخارج للتنمية؛ وفى الحالة دى يجب أن هذه القروض لا تقل فى مدة تقسيطها عن ١٠ سنوات، لوجدنا أن المديونية بتاعتنا بالنسبة للخارج - حتى لو أخذنا الرقم التفسيري بتاع وزارة الاقتصاد - يمثل حوالى ١٧٠ مليون جنيهه فى السنة.. ودا رقم ممكن مواجهته.

## سرى للغاية

ولكن يمكن علشان برضه الأرقام فى كثير من الأحيان لها deceptive، لما بنجملها بدون تحليل لكل رقم على حده يجب إن احنا نقسم هذا الرقم - اللي هو مديونيتنا للخارج - لأصناف القروض اللي احنا أخذناها.

ولو حللنا هذا طبعا - يمكن الأرقام مش عندنا دلوقتى - لكن بصفة عامة بنجد إن الأرقام اللي احنا مديونين بها لدول العملة الحرة هي اللي فى الواقع التي تمثل العبء الأكبر؛ لأنها على سنوات قليلة بالنسبة لدولة بتتمى نفسها. فمن هذا أنا بارجع الى إن هذا التحليل بيورينا إن احنا خطأنا الأساسى كان فى الفترة اللي فاتت بالنسبة للاقتراض من الخارج هو:

أولاً: اندفاع كبير نحو الاقتراض من دول عملات حرة، تجارنتنا معها أو ال prospects بتاع التجارة بتاعتنا والتوسع فيها معها فى السنين القادمة، مهباش كبيرة ومحدودة.

وثانياً: ودا الأهم، إن هذه الدول كانت بتقرضنا على آجال قصيرة، ومش بس الدول بل أيضا المؤسسات الدولية زى البنك الدولى وصندوق النقد الدولى. فى الواقع يعنى منقدرش نجمل الأرقام، لازم نقسم هذه الأرقام ونشوف ونفصصها.. مديونيتنا طويلة الأجل المعقولة، مديونيتنا قصيرة الأجل، ومع من من الدول بنقدر نطلع بحلول نتيجة هذا؟ زى ما قال الرئيس دلوقتى: قد نصل الى حلول مع هذه المؤسسات أو هذه الدول اللي هي مش عاوزه تقسط على مدى بعيد طبقا للعرف الدولى المعروف، إن دولة نامية لا يمكن أن تقترض لثلاث سنوات وأربع سنوات أو خمس سنوات، وبسعر الفائدة العالى ده؛ إن احنا مندفعش فى بعض الأحيان. ويمكن برجع الى السنين اللي فاتت وياتذكر، أد إيه كان فى الميزانية النقدية بيتعمل stress على حتمية إن احنا نسدد بالعملات الحرة.. ولازم. والضغط علينا باستمرار من العملات الحرة، كان بيجعلنا نخصص جزء من الميزانية النقدية علشان نسدد سواء صندوق النقد أو البنك الدولى، دون محاولة جدية لتقسيم هذه الديون على سنوات طويلة.

فى الواقع لازم هذا التحليل بنطلع به، والحلول اللي هي قبل الإجراءات اللي قد تؤثر على سياستنا سواء سياستنا الداخلية أو سياستنا الدولية.

بالنسبة لموضوع اليمن، الحقيقة يعنى رغم يمكن إحنا بننسى الظروف اللي احنا كنا فيها سنة ثورة اليمن.. والواحد لما بيستذكر هذه الظروف دلوقتى وبيعيد الذاكرة اليها، أنا بقول: إن احنا لو - أنا شخصيا - لو اتوجدنا فى نفس هذ الطرف مع سوء التقدير فى الموقف؛ لبرضه أيدت إن احنا كنا نروح اليمن بعد ماكان حصل الانفصال وكان فيه مد رجعى فى المنطقة، وأصبحنا محاصرين من جميع الجهات بما فيها السودان

## سرى للغاية

وحكومة السودان وكنا بنقاتل كل جبهة. دا الحقيقة رغم التضحيات اللي فى الأرواح أو فى الأموال التي ضحيناها فى اليمن، أنا باعتبار إنها كانت حتمية بالنسبة لنا.

صدقى: فيه رقم يافندم، كان السيد حسين الشافعى بيشير الى أن المديونية اللي هي مفروض ندفع عنها ٤,٥٪، لو أنها استثمرت بحيث إن مفيش ضمان ال ٤,٥٪ يتحقق، فأنا صدفة كنا عاملين دراسة بالنسبة لقطاع الصناعة أو المؤسسات التابعة لوزارة الصناعة حاليا يمكن بتلقى ضوء على هذا:

- جملة الأرباح التي حققتها الشركات عن السنة المالية ٦٦/٦٧ بعد خصم الخسائر التي حققتها بعض الشركات - يعنى فيه شركات رحبت وشركات خسرت - أخذنا ال net طلع حوالى ٤٠ مليون جنيه أرباح.

- جملة رأس المال المدفوع فى تلك الشركات ٢٠٥ مليون جنيه.

- جملة رأس المال المملوك بتلك الشركات.. يعنى إذا أضفنا الى رأس المال المدفوع الاحتياطات أيضا لدى الشركات جملتها ٤٨٩ مليون جنيه.

معنى هذا إن نسبة الأرباح الصافية الى رأس المال المدفوع ١٩,٥٪، نسبة الأرباح الصافية الى رأس المال المملوك حوالى ٨٪.

طبعا دا لم يأخذ فى الحسبان استخدامات المؤسسات المتوقع، لا يقل معدل الربح فى هذه الحالة الى رأس المال المدفوع عن ١٢٪، طبعا إذا أخذنا فى الحسبان إن الربح الصافى بيأتى بعد ما الشركات بتدفع ضريبة الأرباح التجارية وكثير من مثلا التأمينات الاجتماعية للعمال.. نصيبهم فى المصروفات وغيره. يبقى معناها إنه بالنسبة للاقتصاد القومى، عائد هذه الاستثمارات إذا حسبت على رأس المال المدفوع تبقى أكثر من ١٩,٥٪، وإذا حسبت على رأس المال المملوك تبقى أكثر من ٨٪، بهذا القدر اللي هو قد يصل الى ٣٪ ٤٪ ٥٪ إضافية.

إذا الاستثمار أو المبالغ التي وضعت فى مشروعات على الأقل فى هذا القطاع بالنسبة للمؤسسات المملوكة لوزارة الصناعة حاليا، بتعطى عائد أكبر بكثير من نسبة ٤,٥٪ أو ٥٪ أو ٦٪ ودا من واقع بيانات ٦٦/٦٧.

وبالنسبة لما يقوله السيد زكريا محى الدين بالنسبة لضرورة إن احنا نسدده.. ودا ضرورى وحقيقى، أنا بقول: إن العائد بتاع كثير من الاستثمارات التي تمت واللى هي ظهرت نتيجتها فى موقف المديونية الحالية بالنسبة للخارج، هي دى أيضا هتساعد فى حل الموقف مستقبلا.

## سرى للغاية

أنا هتكلم عن حاجات مثل واحد وواقعى مافيهش guessing لسه للمستقبل..  
البترو: يعنى مثلا حقل مرجان حاليا بينتج فى حدود ١٠٠ ألف برميل، المقدر  
والمؤكد إنه يرتفع الى ٢٠٠ ألف أو الى أكثر من هذا. يبقى معنى لو أخذنا هذا الرقم  
لوحده بيعنى زيادة ٣,٥ مليون أو ٤ مليون طن، لو ضربناها فى نصيبنا اللى هو حوالى  
٣ جنيه من ثمن التصدير يبقى يعطينا عملة صعبة ١٢ مليون جنيه.  
أنا سايب حقل العلمين وحقل أبوماضى، اللى هى أيضا مفروض إنها لازم تقيم  
وتعطينا حسة. فيبقى إذا من قطاع البترول لوحده أدى عائد محقق أكيد بالعملة الصعبة  
مهواش بحساب الاتفاقيات؛ بيعطينا مثلا مع التفاؤل بقول: إنه لازم يعطينا ٢٠، ٣٠  
مليون جنيه، بنقدر نقول: إن هم دول اللى سيادتك بتشير اليهم يعنى بنعطى للناس  
جزء من اللى علينا.

جاء لى واحد اسمه أتو سكرازونى، أظن طالب مقابلة سيادتك اللى هو كان  
اعتقل موسولينى فى أثناء الحرب، وبعدين قعد يتكلم كثير. هو الحقيقة اللى طلب إنه  
بيجى يقابلنى الأخ أمين هويدى وقال لى: قابله، فتكلم وقال لى واقعة معينة أحب  
أبلغها:

إنه فى مارس سنة ١٩٦٧ لوشىوس باتل أبلغ صحفى اسمه مانسفيلد انجليزى -  
أو يعنى يظهر إن مانسفيلد دا كان بيكتب له التقارير بتاعته أو حاجة من هذا القبيل -  
إن لوشىوس باتل بعث للحكومة الأمريكية إنه احنا بنعامل الجمهورية العربية المتحدة  
على إنها دولة فقيرة! الموقف مهواش كده والتقديرات الأكيدة لدى لوشىوس باتل إنه إنتاج  
مصر من البترول فى سنة ٧٠ سيصل الى ٣٠ مليون طن، وفى سنة ٧٢ أو ٧٣  
سيرتفع الى ٦٠ مليون طن؛ وبالتالي كان بينصح الحكومة الأمريكية إنها تغير سياستها.  
للأسف يظهر إنها غيرت سياستها واستعجلت بالعدوان؛ حتى تمنعنا من إن احنا نصل  
الى سنة ٧٠ أو سنة ٧٢! لكن يعنى دا طبعاً لوشىوس باتل لم يتكلم من عنده دى  
البيانات اللى لدى الشركات الأمريكية أو اللى هى تتبأت بها.

أنا مباحذش بهذه الأرقام، إنما أنا بقول: إن زى ماسيادتك بتقول إحنا الحقيقة  
أخذنا دائما الأرقام اللى هى بتعطينا صورة سيئة؛ ودا لازم علشان نعرف رأسنا من  
رجلينا. لكن أيضا بقول: لازم نحسب الكلام اللى قاله الدكتور القيسونى: إنه قيمة هذه  
المديونية تحولت حاليا الى assets قائمة فى البلد؛ مصانع وبتترول وأرض زراعية  
استصلحت و.. و.. إلخ. العائد من كل هذا لسه مبلغش حده.. يعنى لو وقفنا الاستثمار  
بالكامل النهارده برضه دخلنا هيزيد وإنتاجنا هيزيد؛ لأن المشروعات اللى هى لسه  
مكملتش فى التنفيذ وقاربت الانتهاء هتبتدى تجيب عائد زى مثلا موضوع البترول.



## سرى للغاية

أنا بس حبيت أعطى الرقمين دول؛ لأنه بالنسبة للمديونية المحلية واضح إن احنا المشروعات العائد منها يغطى الفائدة وزيادة، ويبقى عن طريق الاستدانة محليا أمكنا إن احنا نستثمر هذه الفلوس، وفي النظام الاشتراكي فى رأى أنا إن الدولة هى السبيل الى تجميع فلوس ثم الى استثمارها والعائد بيرجع تانى.

وبالنسبة لميزان المدفوعات، طبعا دا النقطة الحرجة عندنا لكن أنا معتقدش إن العملية بالسوء اللي احنا بنقولها. بالنسبة لمديونية الأقساط، أنا بأرجو بس إن يتعمل time schedule؛ لأن أقساط القرض مثلا بتاع سنة ٦٤ ولا قسط يستحق منه قبل سنة ٧٢، ٧٣، ٧٤.. ولا قسط! لأنه حسب شروط الاتفاق السوفيتي، إنه يبدأ أول قسط بعد سنة من انتهاء توريد آخر جزء فى كل مصنع. إحنا لسه منفذناش ولا عقد منهم، فإزاي نحسبه فى حساب المديونية؟! أنا باعتقد إن أقساط السد العالى أيضا أظن ممتدة لسنة ٨٠ أو شئ من هذا القبيل.

أصوات: ابتدينا.

سليمان: المرحلة الأولى ابتدينا ندفعها بعد التحويل على طول.

صدقى: بس نحسبها بقى.. نحسب الأقساط يعنى بتتراكم الى سنوات طويلة.

سليمان: لا.. ماهى محسوبة.

صدقى: فبرغم ضخامة المبلغ، لكن لما نقسطه يعنى بقول: إن دا سداده هيثم على ١٢، ١٥

سنه أو ١٠ سنين، أيا كان الرقم متبقاش بالصورة اللي احنا بنقول عليها.

نأخذ رقم تانى، زيادة إنتاجنا السنوى نتيجة للاستثمارات اللي احنا عملناها، زيادة إنتاجنا السنوى كام، وما تعنيه هذه الزيادة من الإنتاج من وفر فى الاستيراد أو زيادة فى التصدير؟ إحنا أمامنا واقع ١٥ سنة أمامنا أرقام، أنا باعتقد إن هنلاقى باستمرار إن الزيادة فى الإنتاج وماتعنيه من وفر أو زيادة فى التصدير هتبقى أكثر بكثير جدا من الأقساط اللي علينا؛ لأن هو دا المقياس.. هل استثمر أو لا استثمر؟ أنا مع السيد زكريا محى الدين إن الموقف محتاج إن احنا نشوف ميزان المدفوعات.

## سرى للغاية

أنا بقول: إن علاج ميزان المدفوعات إن احنا يانزود التصدير يانقص الاستيراد.. هننقص استيراد من إيه؟ الموارد الاستهلاكية أصبحت فى الواقع دلوقتى هى الموارد الضرورية.. القمح والحاجات دى. الباقي مستلزمات إنتاج يبقى هننقص مستلزمات إنتاج ياهنقص إنتاج. لو نقصنا إنتاج - وأغلبه أو ٩٩٪ منه النهارده ضرورى - يبقى هستورده جاهز؛ زى ماعملنا السنة اللى فاتت والسنة اللى قبلها! مش ممكن نعمل هذا، يبقى لازم نزود التصدير يعنى ندفع عجلة الإنتاج. وأنا بقول: يعنى أنا مش برضه سيادتك أشرت الى إن مش عايزين تبقى الصورة أسود من اللازم ولا أبيض من اللازم، أنا مش شايفها الحقيقة لا هى سوداء قوى ولا هى كمان مهباش وحشة بالدرجة اللى احنا بنتناقش فيها.

أنا أرجو إن الاستثمارات التى تمت الى الآن، نشوف لو وقفنا لو السنة دى قلنا خلاص من سنة ٦٨ مش هنحط ولا ملين جديد، إيه العائد الاضافى لهذه الاستثمارات فى السنوات القادمة؟ هنلاقى إن الحصيلة بتاعت الاستثمارات دى لسه مأخذناهاش.. السد العالى كله مأخذناش منه حاجة!

عبد الناصر: لو وقفنا مش هناخد حاجة.. لو وقفنا استثمار مش هناخد حاجة أبدا!

صدقى: ما أنا فاهم دا صح يافندم بس بدى أقول إيه: إن يعنى معناها إن الصورة مش سيئة.. يعنى إنه زى ما مديونتنا زادت لكن كمان امكانياتنا على السداد زادت وزادت بسرعة أكبر - دا رأيى أنا - ونقدر نحسبها رقميا. والتخطيط يقدر يجيب هذه الأرقام نشوف إنتاجنا زاد فى السنين الماضية أد إيه؟ دخلنا زاد أد إيه؟ فى ميزان المدفوعات قدرتنا على السداد أو على منع الاستيراد زادت أد إيه؟ ومقابلها الأقساط التى استحققت زادت أد إيه؟ وهو دا اللى يبين سلامة سياسة الاستثمار من عدمه؛ لأنه إذا تبين إن استثمارتنا لم تؤد الى أنها الأقساط التى استحققت نتيجتها تغطيتها وزيادة يبقى كنا غلطانين، لكن لو كانت بتغطيها بالعكس بتجيب أكثر منها يبقى بتورى إن هو دا السبيل الى الحل.

مش معنى دا إن احنا لا تناقش المشروعات، مش معنى دا إن احنا فيه حاجات غلط لازم نصلحها، مش معنى دا عدم رقابة! لأ.. أنا بأتكلم ال principle نفسه، وأنا متهيألى إن بمراجعة الأرقام بتتضح هذه الصورة، ويعنى أنا دائما هذا مبدئى وأنا شايف إن احنا يمكن جدت أعباء يعنى جعلتنا وقتيا الصورة أصبحت صعبة، لكن أنا أرجو إن دى متخليناش يعنى نغير التفكير؛ لأن مفيش لنا سبيل إلا زيادة الإنتاج.

## سرى للغاية

محي الدين: هي الحقيقة إنا في مناقشتنا، إنا كنا نتكلم كثير في هذا الموضوع بقى لنا معنى مدة طويلة، لكن معنى إذا خرجنا من اجتماعاتنا وإنا معنى مش واضحين بالنسبة لحقيقة الموقف؛ يبقى الحقيقة مش تمام معنى يبقى هنبني دراستنا ونرسم سياستنا بالنسبة للمستقبل إزاي؟

في معنى الكلام اللي أنا قلته، بننتظر أسبوع ويبجي الدكتور حسن وهو عنده الجدول وأفكر عندكم أيضا هذا الجدول؛ السنين القريبة فيها أقساط مستحقة علينا، أنا مبتكلمش على مجموع مديونية معنى مبقولش: إنها ٧٠٠ ولأ ٩٠٠ ولأ ١٠٠٠. أنا بقول: فيه أقساط موجودة تشكل في السنين القادمة.. أنا شفت أذكر هذه الأرقام كانت ١٣٥ - ١٢٠ أرقام بهذا الشكل، بافتراض أنقى هذه الأرقام من الأجزاء اللي يصح مدفعهاش زي مثلا المعونة الأمريكية أو أى حاجة؛ فبقول: هتوصل لإيه؟ هتوصل برضه لحاجة كبيرة أنا شايف الموقف.. معنى مش..

عبد الناصر: آه.. لكن لها حل.

محي الدين: آه.

عبد الناصر: معنى مثلا حسن عباس وكلامى مع مازوروف لإعادة جدولة الأقساط الروسى، بحيث الأقساط اللي علينا سنة ٦٨ و ٦٩ و ٧٠ دى هي الكبيرة بالنسبة للاتحاد السوفيتى؛ فدى بنقلها قوى ونعيد جدولتها. ولما راح على تكلم مع برجنييف فى هذا وحصل موافقة مبدئية على الموضوع.. ففيه حل.

محي الدين: آه.. فيه حل، بس هذا الحل يحتاج الى مجهود. ما إنا بنحاول تصور الموقف علشان إن العملية محتاجة الى مجهود فى الكام سنة الجايين دول، علشان نعمل فائض يمكننا إن إنا نواجه هذه الأرقام الموجودة والمؤكدة. معنى منقعدش نقول: طيب هل هي ١٣٥ ولأ هي ١٢٠ ولأ هي ١٠٠؟! لأ.. دا حتى لو كانت ١٠٠ أنا باعتبار الموقف serious، على حسب الخط اللي إنا ماشيين فيه بالنسبة اللي هو يتصل بال system.. معنى لازم ال system يبقى يمكن من المتابعة، ويبقى فيه حساب سنوى عملته فى آخر السنة علشان نقدر نسدد الحاجات دى. أنا مش شايف فيه مجهود بببذل لمواجهة هذا الموقف! النهارده الهدف من طبعا - زي الرئيس مايقول - الاجتماعات دى إنه هنشوف إيه الطريقة اللي هتمكنا من مواجهة هذا الموقف.

## سرى للغاية

صبرى: أنا بقول: بس لازم نفصص هذه الأرقام.. يعنى ١٣٠ على للاتحاد السوفيتى كام..

محق الدين: موجودة يا على.. موجود الكلام ده.

صبرى: لأن لا يمكن فصل ما بين العملية الاقتصادية - زى ما قال الرئيس - والموضوع السياسى. ممكن إذا كان مع الاتحاد السوفيتى بنعيد الجدولة بنقدر إذا كان بقى دولة بارمى طوبتها زى ألمانيا الغربية، إنما بس نفصص هذه الأرقام، لكن ١٣٠ مليون جنية التزام وأنا كل صادراتى ٤٠٠ مليون.. على طول حاجة مزعجة، لكن لو أفصص الـ ١٣٠ والآقى إن أنا فيه جزء هنقيه وفيه جزء هرفضه نهائيا وفيه جزء هعيد تقسيطه.

عبد الناصر: دول أعادوا التقسيط؟

صبرى: آه.. طبعا.

صدقى: العالم كله بيعمل كده يافندم.

صبرى: كل الدول بتعمل كده.

عبد الناصر: أعادوا جدولوا.. جدولوا لإندونيسيا يادكتور عبد المنعم؟

القيسونى: أيوه... ويوغوسلافيا.

محق الدين: لأن مفيش حل غير كده.. لأنهم بيدفعوا لى الـ double.

صدقى: فى كل العالم.. كل الدول.. إنجلترا طلبت كده.

محق الدين: بس أندونيسيا مبلطة فى الخط ولا بتستثمر ولا بتعمل. حتى رجعت الشركات الأجنبية أخيرا يعنى، لكن إحنا مش كده.

أصوات: (ضحك)

محي الدين: إحنا بنبنى آه.. يعنى الواحد بيدور على الأفواه اللي بتتولد كل سنة دي.

الشافعى: هو بالنسبة لكلام الدكتور عزيز، يعنى الحقيقة الواحد لما بيقول هذا البيان يعنى مايقصدش إنه هو يورى إلا الحقيقة، عايزين لها تفسير فعلى بحيث إن احنا نعرف نقطة الخطر فين، وبعدين طريقة الحل لمعاملة هذه الديون معاملة سليمة، وبعدين طبعا الأرباح اللي أشرت إليها؛ ماهى يمكن اللي كانت أحد العوامل اللي مخلصت الصورة أسوأ بالنسبة لمجموع الاستثمارات. لكن يعنى هى دي كانت عنصر موازنة، إذا كانت باينة أنها ٨ أو ١٩,٥ يمكن دي اللي كانت بتوازن قطاعات أخرى فيها استثمارات لسه مجابتش عائد أو قطاعات أخرى مخرسة.

سليمان: هو يعنى الفكرة فى اعتقادى فى هذه الاجتماعات باستعراضنا للماضى، علشان يكون الهدف إننا نعرف إحنا واقفين فين بالضبط يعنى تشخيص للحالة، يجب أن يكون صادق.

فيما يختص بالاستدانة المحلية فى اعتقادى إن لها تأثيرين:

أولاً: العبء اللي تضعه على السنوات المقبلة نتيجة لخدمة الدين.

ثانياً: العبء اللي تضعه الموارد غير العادية على العجز فى الميزان الحسابى.

يعنى إذا استدنا إذا أخذنا فلوس من البنك معنى كده إن على طول بيحصل خلل فى ميزانا الحسابى.

بالنسبة للدين الخارجى، المشكلة مهياش مشكلة السداد ولكن هى قدرتنا على تمويل إضافى سواء لاستثماراتنا أو لغيرها. إحنا إذا كان فى أحسن الحالات العجز الـ net فى الميزان الحسابى ٧٠ مليون جنيه، الحقيقة إحنا مينفكرش هنعسد إيه؛ لأن احنا بنزود مديونيتنا على الأقل ٧٠ مليون جنيه لغاية مانوازن بين صادراتنا ووارداتنا سواء المنظورة أو غير المنظورة؛ وفى هذه الحالة يبقى نفكر فى السداد.

إحنا موصلناش أبدا لهذه المرحلة ودى أملنا إن نصل إليها فى وقت من الأوقات. فالمشكلة التى تعوقنا عن التنمية المستقبلية، هى عدم قدرتنا على الحصول على قروض جديدة! طبعا البلاد الغربية مبتقرضناش وإذا تساهلت معنا هتقرضنا فى حدود ما يمكن لنا سداه. البلاد الشرقية عندها قروض لسه لم تستخدم، هذه القروض من بلاد من الدرجة الثانية أو من الدرجة الثالثة أو من الدرجة الرابعة، ويناخذ منها

## سرى للغاية

خبرات وبرضه مهياش يعنى التكنولوجيا الحديثة اللي تخلى عملية التنمية بتاعتنا ممتازة.

أول حاجة هي زيادة المدخرات، زيادة المدخرات إذا وصلنا بها الى الحد المناسب للاستثمار هيبقى قطعاً في هذه الحالة نقدر نقول: إننا نقدر نعتمد على أنفسنا ونقدر نعتمد على مواردنا. الى أن نصل الى هذا برضه علينا إننا نبص في عملية إزاي نزود المدخرات؟ المسألة مش مسألة زيادة تصدير وتقليل استهلاك؛ هي إحنا بنقدر نمي أد إيه؟ وبنقدر من اللي بنميه دا ندخر أد إيه؟ وبنقدر نحجب عن الاستهلاك أد إيه؟ هي دي المشكلة العويصة.. يعنى لو قلنا إننا ثبتنا الاستهلاك النهارده ممكن إن مشكلتنا تتحل على ٣ سنين، إنما دا مستحيل.. أفندم؟

عبد الناصر: إزاي؟

سليمان: تثبيت الاستهلاك، يعنى إننا لا نسمح باستهلاك إضافي، إننا لا نسمح بأجور إضافية؛ معنى كده إن كل زيادة في الدخل القومي بتحول الى مدخرات. إذا قلنا إن الزيادة في الدخل القومي حوالي ٥% × ٢٠٠٠ مليون يعنى كأننا بنوفر ١٠٠ مليون جنيه في السنة، في الثلاث سنوات بنوفر ٣٠٠ مليون جنيه في السنة بيضافوا الى المدخرات؛ نوصل الرقم الى ما يقوله الدكتور القيسوني لـ ٢٠٪، إنما المهم إننا نحسب ماهي المدخرات الفعلية. فيه كذا طريقة لحساب المدخرات - أنا الحقيقة يعنى مختلف في بعض الأرقام مع الإخوان - لو حسبنا الدين الخارجى زائد الموارد غير العادية بأجد إن معدل الإدخار في السبع سنين اللي فاتوا لم يزد عن ٧,٥٪، منين محسوبة ١٣، ١٤٪؟

القيسوني: الدين الخارجى زائد إيه؟

سليمان: تحب أشرحها.. تسمح أشرحها؟ الموارد العادية التي استخدمت في خلال الخطة في السبع سنوات الماضية بلغت ٦٧١ مليون جنيه بالعجز من الجهاز المصرفي، و٨٨٦ مليون بالعجز من العالم الخارجى، مدخل فيهم أنا المعونة وفائض الحاصلات الزراعية على أساس إن مش هتبقى متاحة مستقبلاً؛ يبقى الجملة برضه أخذت الحد المأمون من الاقتراض من الجهاز المصرفي اللي قال عليه الدكتور القيسوني ٣٪ طلعت ٣٥٠. إن جملة التمويل بالعجز الغير مأمون ٣٢١ من الجهاز المصرفي اللي يعنى لا يصح إن أنا أبني عليه سياسة مستقبلة، زائد ٨٨٦ عجز من العالم الخارجى يبقى ١٢٠٧.

## سرى للغاية

استثماراتها فى خلال المدة بما فيها استثمارات الخدمات بلغت ٢٢٢٨؛ بمعنى أن المدخرات خلال الفترة الماضية لم تتجاوز ١٠٢١، من غير ما نخصم الاستحقاقات العسكرية.. يبقى المدخرات الفعلية ٧,٧٪ من متوسط الدخل، ولو حسبنا الاستحقاقات العسكرية طبعا الرقم ينزل عن كده بكثير.. فالحقيقة علينا أننا نعرف على وجه الدقة..

عبد الناصر: إحنا عايزين نعرف الحقيقة.

سليمان: آه.. معنى ممكن إننا نحسب المدخرات مثلا الفعلية اللي حصلنا عليها فى سنة ٦٦/٦٧.. أظن وزارة الخزانة تقدر تحسب لنا دى.

القيسونى: عندنا دى يعنى..

سليمان: وبعدين نخصم منها عجز الخدمات.

القيسونى: يعنى إذا سينا سنين الخطة الأولى، اللي كان فيها فائض الحاصلات الزراعية الأمريكية جايز بيؤثر على الصورة بشكل ما؛ يعنى لو أخذنا السنتين الأخيرتين ٦٥/٦٦ و٦٦/٦٧ يعنى جملة العناصر الايجابية فى المدخرات كانت حوالى ٤٠٠ مليون جنيه.. اللي هى بتمثل فعلا الـ ٢٠٪. ولكن مقابل ذلك فيه عجز فى ميزانية الخدمات نتيجة لزيادة المصروفات عن الإيرادات فى ميزانية الخدمات الجارية، بياكل ٧٠ أو ٨٠ مليون جنيه من الـ ٤٠٠ مليون.

فالنتيجة إن المدخرات الصافية كانت حوالى ٣٢٠ مليون جنيه، الـ ٣٢٠ مليون جنيه لإجمالى ناتج محلى بتاع ٢٤٠٠ يعنى اللي هى حوالى ١٣٪.

فالمدخرات فى السنتين الأخيرتين ماشيين على أساس ١٣٪، إذا قدرنا إحنا نخفض العجز فى الميزان الجارى بتاع ميزانية الخدمات، يعنى ممكن نزود الرقم بتاع ١٣٪ من غير إجراءات إضافية. يعنى الميزانية السنة دى، مثلا الإجراءات التى اتخذت فى الباب الثانى والإجراءات التى اتخذت فى الباب الأول، إذا كان بعد إزالة آثار العدوان يعنى ممكن تتخذ إجراءات فى الباب الرابع كمان، ممكن إننا نرتفع بالمدخرات ارتفاع حقيقى، وزى ما قلت فى المذكرة التى قدمناها فى بداية هذه الاجتماعات: يعنى فى الإجراءات دى هتجيب ٧٠ مليون جنيه.

## سرى للغاية

ولكن برضه يعنى ودا الهدف اللي بارجو أننا نصل اليه، إن الـ ٧٠ مليون جنيهه  
دى لن تمكنا برضه مع كل الإجراءات التي اتخذناها - كل الإجراءات التي اتخذت في  
الميزانية - مش هتمكنا من الاستمرار في التمويل.. من إجراء التمويل بدون تضخم.  
يعنى لازم برضه نزود عليها حاجة؛ علشان كمان إحنا مش عايزين بس الـ ٢٠٪ ولكن  
عايزين ٢٠٪ زائد مبلغ إضافي علشان السيولة في الوحدات الإنتاجية، مبلغ إضافي  
علشان سداد التزامات قديمة؛ فإحنا عايزين إجراءات فوق إجراءات يوليو بحوالى مثلا  
٦٠، ٥٠ مليون جنيهه إضافي ٧٠ مليون جنيهه.

تسمح لى سيادتكم.. الواقع يعنى أنا يمكن بدأت موضوع القروض الداخلية  
والخارجية، يعنى أنا باعتبار القروض الداخلية في الوقت الحالى - وأنا أكرر - إنها  
تمثل خطورة عندما يحصل تضخم؛ يعنى لما يحصل أن القروض الداخلية تزيد عن حد  
معين - اللي هو أنا اقترحت في المذكرة الأولى إنه يكون في حدود ٣٪ - يعنى زيادة  
في القروض الداخلية ٣٪ من وسائل الدفع المتاحة.. يعنى حوالى ٦٠٠ مليون جنيهه  
٧٠٠ مليون جنيهه و ٣٪ منها يعنى مثلا ٢٠، ٢٥، ٣٠ مليون جنيهه. أى حاجة زيادة  
عن كده ممكن إنها تسبب خطورة خصوصا أننا أصبحنا دلوقتى في موقف مشلول.

جايز السنة دى يعنى إن فى بداية السنة سنة ٦٧/٦٨، كان فيه شئ من  
الارتخاء فى الشد.. دا يعنى التضخم مكانش ماشى بشدة، ولكن رجعنا تانى فى أكتوبر  
ونوفمبر وديسمبر ابتدينا بشدة تانى.. يعنى زادت وسائل الدفع مرة أخرى. فالموقف  
الداخلى بالنسبة للقروض الداخلية من الجهاز المصرفي، عايز متابعة ومتابعة مستمرة  
بحيث أننا منزودش عن رقم معين كل سنة نتقفل عليه فى حدود ٢٠، ٣٠ مليون جنيهه.

الـ bottle neck بالنسبة للقروض الخارجية، برضه بقول: إن فيه bottle  
neck وفيه صعوبة، ولكن هذه الصعوبة قابلة للحل ويمكن حلها بدراسة وسياسة طويلة  
الأجل. أنا يمكن لا أتفق مع سيادتكم فى أننا نمتنع عن السداد فى بعض الدول، أنا  
بقول: إحنا محتاجين لقروض لمدة سنين طويلة لقدام، فإذا عملنا default يعنى إذا  
توقفنا عن السداد لأى دولة من الدول بتحدث رد فعل على طول فى بقية الدول كلها.

يعنى إذا كان هنتنع عن السداد لأى دولة من الدول الغربية، على طول هنتؤثر  
على موقفنا فى صندوق النقد الدولى فى البنك الدولى وفى الدول الغربية الثانية لأنهم  
على اتصال غريب! يعنى الواحد يبقى فى فرنسا ويبقوا فى ألمانيا عارفين الواحد بيعمل  
إيه؛ فى البنك المركزى البنوك المركزية والبنوك التجارية متصلين ببعض اتصال غريب!  
وإذا قلنا النهارده: هنتوقف عن السداد لألمانيا أو لإيطاليا تحدث رد فعل فى فرنسا على  
طول! فرنسا هنتقول النهارده بيعاملونى كده ولكن بكره هنتبقى المعاملة إزاي!؟



## سرى للغاية

فأنا أرجو إننا نعامل الديون الخارجية معاملة بحيث أننا نبنينا على الاتفاق؛  
يعنى لازم قبل الجهد، والجهد جايز يكون جهد شاق ولكن مهواش جهد مستحيل للاتفاق  
مع الدول الغربية والدول الشرقية على السواء؛ لإعادة جدولة الأقساط دى - وزي  
ماسيادتك قلت - إندونيسيا عملت والدول الغربية عملت والدول الشرقية عملت  
يوغوسلافيا عملت اليونان عملت، دول كثيرة عملت إعادة جدولة. وإحنا ماشيين فى  
إعادة الجدولة، من سنة ٦٥ مشينا مع بعض الدول، وبعدين السنة دى بعض الدول  
الأخرى.. يعنى إيطاليا مثلا ماشية معنا فى إعادة الجدولة، أسبانيا ماشية فى إعادة  
الجدولة، صندوق النقد الدولى ممكن إننا نعمل إعادة جدولة. ومشى صندوق النقد  
الدولى، هو ميزته إنه بمقتضى الاتفاقية بمقتضى القانون بتاع صندوق النقد الدولى إن  
أى قرض نحصل عليه ممكن يؤجل سداه الى مدة أدناها ٣ سنين وأقصاها ٥ سنين..  
المدة العادية ٣ سنين، وبعدين ممكن فى الظروف إذا طلب العضو وإذا كان الميزان  
الحسابى بتاعه يستدعى ذلك تمد المدة الى ٥ سنين.

فأى مبلغ نأخذه النهارده من صندوق النقد الدولى، معناه إن ممكن يؤجل مباشرة  
الى ٥ سنين.. يعنى نسدد الفلوس اللى علينا لصندوق النقد الدولى النهارده اللى هو  
مثلا ٤٥ مليون دولار، وبعدين الـ ٤٥ مليون دولار دى لا تستحق إلا بعد ٥ سنين  
أخرى، هو هيبقى فيه أقساط بعد النهارده.

عبد الناصر: أقساط قديمة ١٠٠ مليون.

القيسونى: بتاعت الصندوق آه.. وغير الـ ٤٥ مليون دولار، ولكن برضه بمقتضى اتفاقية  
الصندوق ممكن إذا استمرت العلاقة وكانت علاقة طيبة، إن كل قسط نسدده أو كل  
مجموعة من الأقساط نسددها كل ٦ شهور، ممكن عمل اتفاقية جديدة بحيث إننا نزيح  
كل المديونية بتاعتنا مع الصندوق ٥ سنين. ببعدين عايزة سياسة مع الدول؛ يعنى أنا  
يمكن متفق مع السيد زكريا فى إن مثلا الدول العربية برضه لازم نعاملها بطريقة معينة.

عبد الناصر: دلوقتى مش متفق معايا ومتفق مع زكريا! (ضحك)

أصوات: (ضحك)

القيسونى: لأ.. لأ أنا باعرض..

عبد الناصر: متفق على إيه بقى؟! (ضحك)

أصوات: (ضحك)

عبد الناصر: أنا مش هتكلم بقى بعد كده! (ضحك)

أصوات: (ضحك)

القيسونى: يعنى الدول العربية، إذا كانت الكويت دائنة لنا بـ ١١٠ مليون جنيه.. دا أكبر دولة يعنى، لازم نشوف فرصة أو وسيلة معينة بحيث أننا نتفق معاها؛ يعنى إذا اتفقنا معاها على تأجيل هذا المبلغ ٥، ٦، ٧ سنين يعنى باستريح يعنى راحة كبيرة. وبعدين ألمانيا الغربية، ما هو لازم كل دولة يعنى نشوف ألمانيا الغربية عايزة تعيد العلاقات ومش عارف إيه. هو جزء من الدين بتاع ألمانيا الغربية دين طويل الأجل وجزء تانى دين قصير الأجل، يعنى الدين القصير الأجل لازم نزيحه برضه. يعنى هل ممكن فى المباحثات بتاعة إعادة العلاقات أو مباحثات قريبة منها أننا نتفق معاها على إعادة الجدولة؟

الدول الشرقية اللي يهمنى بالذات هو الاتحاد السوفيتى الدول الثانية يعنى القروض معاها بسيطة. الاتحاد السوفيتى بقى يهمنى علاوة على الكلام دا علشان الأقساط العسكرية.. الأقساط العسكرية اللي هى مش واردة هنا.

فالصورة قابلة للحل ولكن عايزة مجهود كبير، عايزة مجهود فى البداية للاتفاق مع الدول المختلفة على إعادة الجدولة، وعايزة مجهود لضغط الميزان الحسابى بتاعنا بحيث أننا برضه نحاول إننا نوازن شوية.. يعنى إذا نجحنا فى موازنة الميزان الحسابى بتاعنا. هو الأخ صدقى بيقول: إن العجز فى الميزان التجارى مثلا فى حدود ٧٠ مليون جنيه فى المتوسط فى الكذا سنة الأخيرة، وأنا بأرجو أننا نأخذ فى الاعتبار إن لما نقول ٧٠ مليون جنيه عجز يعنى معناها بنحط كل بنود الواردات بالكامل وكل بنود الصادرات بالكامل.

## سرى للغاية

فالواردات بالكامل يعنى تشمل السلع الاستثمارية.. السلع الاستثمارية إذا كان فيه ١٠٠ مليون جنيه سلع استثمارية داخلية بالكامل كأنها مدفوعة cash، ولكن أنا إذا قدرت آخذ عليها مثلا ٨٠ مليون جنيه تسهيلات ائتمانية، فيبقى عندى أقدر - بما أوفره من الدفع الـ cash على السلع الاستثمارية - أقدر أبتدى أدفع فى القروض الخارجية بتاعتى. ولكن إذا كانت ١٠ مليون جنيه يعنى مش هنكفى طبعاً.. لا تكفى حاجة، فلازم الضغط فى الميزان الحسابى. يعنى أنا كنت متقدم بمشروع للجنة الخطة؛ أنا نضغط أكثر من كده فى الميزان الحسابى لسنة ٦٨/٦٩، بحيث أنا يعنى مثلا نضغط المصروفات غير المنظورة لسبعين مليون جنيه ونضغط السلع الاستهلاكية والسلع ونزود الصادرات بتاعتنا؛ بحيث إن احنا نقدر نوفر مثلا ٤٠ مليون جنيه مع آخذ التسهيلات الائتمانية فى الاعتبار. إذا كان فيه ٤٠ مليون جنيه نقدر نبتدى بيهم، فى الوقت نفسه لازم نحسن الجو مع الدول الدائنة المختلفة؛ بحيث إننا نقدر نتفق معاهم على وسيلة معينة لإعادة الجدولة.. إحنا عايزين فترة تلتطيف فى الجو؛ علشان نقدر نعمل إعادة الجدولة دى مع الدول الدائنة.

باكستان عملت إعادة جدولة قبل سنتين، عملت إعادة جدولة كبيرة مع إيطاليا السنة اللي فاتت وأندونيسيا السنة دى.

سليمان: هو على كل حال يعنى إعادة الجدولة، مهما كانت الظروف مواتية ستؤدى بنا الى أننا يسمحوا لنا باستخدام مانسده مش أكثر. هى مشكلتنا إزاي نحصل على سلع استثمارية علشان نمشى فى خطتنا.. هى دى المشكلة.

صدقى: هو مفيش صعوبة فى هذا؛ لأن مثلا كل المشروعات اللي بتقدم تتضمن تسهيلات ائتمانية.. انجلترا عارضة ألمانيا عارضة أسبانيا عارضة فرنسا عارضة، يعنى بالنسبة للسلع الاستثمارية كلها ماشية بتسهيلات فى العروض.

محي الدين: مفيش مشكلة، بس هى المشكلة فى مستلزمات الإنتاج عايزين عائد.

صدقى: أه.. عايزين سلع استثمارية.

## سرى للغاية

سليمان: أنا بقول: حتى بالنسبة للسلع الاستثمارية، فيه مشكلة يعنى فيه مشروعات مهمة عايزين نفذها مش لاقيين لها تمويل خالص.. مشروعات السماد.

صدقى: لأ.. دا فيه.. دا فيه مستعدين يوردوا الماكينات كلها ويأخذ من الإنتاج.. ألمانيا الغربية.

محي الدين: بشروط سياسية!؟

صدقى: أبدا.. من غير حاجة خالص، أبدا.. خط كامل جديد فى كيما ويأخذ قيمته من الإنتاج.

عبد الناصر: الكلام كان مع حسن عباس وأظن حصل كلام معاه فى هذا الموضوع.

صدقى: إحنا جالنا عرض يافندم، يعنى طلعت دلوقتى جالى وقال لى: إن فيه عرضين بكذا، قلت له: تمشى معاهم ونشوف. مش بس كده يافندم، لو إن احنا أخذوا إنتاج أول سنة كله تقريبا بيطلع أد قيمة القرض. قالوا: مستعدين إذا كنتم إنتم محتاجين لجزء من السماد يعنى يخصصوا لنا جزء نقسطه على ٤ سنين على ٥ سنين على ٧ سنين للغاية ما يستوفوا. أسبانيا، هو دا لما جالى ٣٠ مليون دولار عارضين قروض استثمارية لمشروعات صناعية يعنى العروض موجودة، فرنسا مقدمة مشروعات بتسهيلات، إنجلترا لما جاء الوفد البريطانى قابلى - فيتشويد زيجمان واللى وياه - قالوا: عايزين نخش.

البشرى: هو الحقيقة برضه الموضوع عاوز تفكير كبير، الحقيقة سيادتكم تفضلت ووضعت هدف إن احنا الأساس نبحت حقائق الموقف. هو طبعا فيه من الناحية العامة فرق فى الإحساس بالنسبة لى الفترة دى عن فترات سابقة. من غير شك، خط المديونية زاد الى حد أصبح يعنى يجب إن احنا نحترس فيه، ونمشى على خطة محكمة ولا ندع أى شئ للظروف. فحقائق الموقف الحقيقة يمكن مابتبرزش لو مسكنا حاجة حاجة، لو مسكنا استثمار أو لو مسكنا سنة مالية معينة وفصلناها عن الصورة المتكاملة. الصورة بتتطق لما بتتكامل الاستثمار مع الإنتاج مع المستلزمات مع الاستهلاك مع الإيداع ومع المديونية والالتزامات اللى علينا ومع السياسة والأسلوب الذى يجب أن نتبعه. فأنا متهيألى لازم نربط الحاجات دى كلها مع بعض، ونحط صورة معينة علشان تحدد لنا المسار السليم أو أكثر الطرق أمنا وسلاما بالنسبة لنا.

## سرى للغاية

متهياىى العملية دى عاوزة تكون ثمرة بحث كبير قوى، ومتهياىى العملية مقسمة نفسها الى مجالات كثيرة للبحث. أول مجال للبحث الموضوع اللى استغرق الليلة اللى هو المديونية.. المديونية الخارجية والداخلية. المديونية الخارجية، أنا طبعا متفق تمام الاتفاق مع كل رأى فيه بان احنا يجب أن نعلم التزاماتنا مفرودة من ناحية الجملة ومن ناحية فردها على السنوات القادمة، ونعمل لها subjection بهذا الشكل. وبرضه ندرس ويبقى أماننا توقعاتنا بالضبط، اللى هى عن مدى استعداد الدول التى قدمت هذه المديونية الى الجدولة أو عدم استعدادها.

وبرضه يعنى فيما يختص بالعملية بتاعة عدم السداد، أرجو برضه إن احنا فى هذه الناحية نخليها كآخر سلاح فى هذا الموضوع؛ فيبقى أماننا خط فيما يختص بالمديونية بتاعتنا الى هذه اللحظة.

وبعدين دا نعمله أساس لأى مشروع مستقبل، أى إجراء هنتخذه مستقبلا هيلقى بظل أو بعبء على خط المديونية للمستقبل. ببقى لازم نرسم الـ curve، على الـ curve دا نرسم نشوف مدى الالتزام هيبقى جنسه إيه؟ وبعدين يجب إن احنا برضه نركز على البحث على السؤال الذى أثاره السيد حسين الشافعى؛ اللى هو.. ماهو الحد الذى يعتبر مقبول وماهو الحد الذى يعتبر غير مقبول؟ لأن العملية تحميلية ولا يجوز أن نحمل أنفسنا بأعباء مادية، وبعدين لا نفترض إنها تحل نفسها بنفسها، عاوزة جهد كبير فى هذه الناحية.

الخط الثانى بتاع البحث، أنا متهياىى دا خط القطاعات الإنتاجية، خط الموارد لازم نعمل زى ما قلت مرة قبل كده مجموعة من التباديل والتوافيق فى خط الموارد.. ماهو أقصى ما يمكن الوصول اليه؟ ومنتنا نعمل العملية فيما يختص باقتراضات معينه بدون استثمارات أو باستثمارات محلية أو باستثمارات يمكن تحملها فى ميزان المدفوعات.

بهذا الشكل نعمل شوية assumptions، وندرس نفسح العملية بقدر الإمكان أو باستثمارات. زى ما بيقول الدكتور عزيز صدقى: فيه دول عايزة تدى استثمارات وتأخذ من ناتج القرض. معرفش يمكن أحمد فؤاد برضه إمبارح كلمنى فى مجلس الأمة كده بسرعة وقال لى: إن فيه الوفد البرلمانى الفرنساوى بيلح عليه إن يخش فى عمليات استثمارات، وبيقول سمد ومش سمد وبتاع يعنى عملية برضه لازال فيها مداوات ممكنة. ندرس هذه العملية وكل قطاع يقدم هذه الـ versions المختلفة طبعا بإرشاد من التخطيط، نقدر نشوف إيه الحاجات اللى هى هتاخذ الـ priorities المضبوطة؟ إيه الحاجات اللى هى يجب إنها تعطى أولوية مطلقة فى هذا الخط؟

## سرى للغاية

الهدف بتاعنا إن احنا نصل الى أقصى أرقام للإنتاج؛ لأن عن طريق الوصول الى أعلى ما يمكننا الوصول اليه فى الإنتاج فى السنوات القادمة يعنى السنة دى ٦٩/٦٨ و ٧٠/٦٩.. يعنى منبطلش سنة واحدة. وبعدين طبعا بيحدنا فى هذا الموضوع إن احنا نمشى فى حدود ميزان المدفوعات؛ لأن مش عاوزين نحمل ميزان المدفوعات بأعباء أكثر من الأعباء التى تحملها فعلا الى هذه اللحظة. دى الصورة الثانية أو خط البحث الثانى.

متهيألى برضه القطاعات الإنتاجية ملزمة بأنها تقدم خط بحث للمستلزمات، وفارق كبير قوى بين أننا بنقدم مستلزمات كميزانية وعن سنة واحدة وبين أننا بنقدم البحث للمستلزمات ومربوطة بخطة طويلة شوية. وعلى أساس إن احنا بنشوف البدائل اللى ممكن، وعلى أساس إن احنا بنشوف يمكن عن طريق التصنيع المحلى قد توفر بعض مستلزمات؛ بهذا الشكل برضه عملية يمكن شاقة شوية. إنما لو تتجمع فروض معينة والرأى ليتوسع دائرة الفكر تتحد كده فى دايرة أوسع، أنا متهيألى برضه هيبقى قدامنا على الأرض أو على الطبيعة فرشاة معينة تمثل لنا curve معين عن المستلزمات.

النقطة اللى بعد دى الأجور، بند الأجور دى عملية شاملة، ويجب إن احنا نطلع بيها سياسة برضه سياسة ثابتة فى هذا الموضوع. أمامنا مبدأ علاوات، أمامنا مبدأ أرباح، أمامنا مبدأ منح، أمامنا تقدم سنوى فى بند الأجور وأعباء سنوية بيتحملها بند الأجور. وأنا متهيألى العمليات دى يجب أن ترتبط بالإنتاج ولا مفر من إن الأجور ترتبط بالإنتاج، كل ما زاد الإنتاج وكل ما زادت الإنتاجية كل ما أمكن إن بند الأجور يزيد، طبعا يمكن بعض تحويلات بسيطة أو بعض عمليات tactical. يمكن العملية دى لو تجمد نهائيا - دى نقطة يمكن خارج البحث بس بأشير اليها - وبعض الجهات أو حنت فى أدنى الدرجات مزنوقة شوية، بيقى برضه عندنا نوع من الـ freedom والـ tactical freedom اللى نقدر نحل بعض مشاكل متأزمة لبعض ناس. إنما general بند الأجور، يجب إن احنا نرسم له سياسة ونرسم له حد بحيث لا يتعداه والحد الذى لا يجوز أن يتعداه، إنه يزيد ويطغى على الإنتاجية بتاعة البلد!

وبعدين الخط.. البحث اللى بعد كده بالتالى اللى هو خط بحث الاستهلاك الفردى، الاستهلاك الفردى إحنا طبعا فيه بحوث كثيرة وفى الفترة الزمنية الماضية السنة أو السنتين يعنى، نفذ هذا البحث الى محيط السلع نفسها. وأنا متهيألى يعنى العملية دى برضه لا بأس من تعريفها الى بحث مستفيض، على أساس عن طريق تقليل الاستيراد نشوف يمكن برضه نقدر نوصل الى بدائل معينة. هو صحيح فيه حاجات اتخفضت

## سرى للغاية

فعلا إنما الظروف متهيألى برضه قد تلجئنا الى أننا نقلل من الاستيراد فى بعض حاجات ونقلل يمكن من استهلاكنا فى بعض أنواع معينة.

وبعدين أخيرا بقى إذا ألجأتنا الظروف الى إجراءات سريعة، يعنى أنا بقول: إن دى نخليها برضه فى المجال التالى بعد ما نخفض الكميات، وبرضه على الأقل هتبقى قدامنا برضه صورة مبتسمة فى هذا الموضوع.

الخط الللى بعد كده هو - زى ما قال الدكتور القيسونى - جوانب الصرف الحكومى، نشوف يعنى الحكومة فعلا بتصرف فى أى بند من البنود ونضع سياسة لذلك تتفق مع الأوضاع؛ يمكن دى الميزة بتاعة حاجة زى دى إنها أى تخفيض فيها يسمع على طول فى الميزان الحسابى.

متهيألى النقط بهذا الشكل، يمكن أنا سبت القروض الداخلية، هو طبعا لا شك إن أى مشروع يجب يتحمل أعباء القرض وإن المشروع يجب أن يسدد أعباء القرض، وإن دا يجب أن يكون مقام الإلزام وليس مقام الاختيار.

بس برضه نقطة بقولها وبعرضها: إن احنا يمكن فى بعض المشروعات أنشئت يمكن رأسمال شركة معينة أو مجموعة من الشركات كان totally قرض، والنهارده الأعباء والفوائد الللى بتدفع للبنوك أصبحت فوايد كثيرة جدا.. فيه بعض جهات بتدفع ٦٠٠ ألف و ٨٠٠ ألف وفيه مليون جنيه فوايد قروض.

فأنا متهيألى برضه لا بأس من أننا نضع سياسة رشيدة ونملك بعض أسهم هذه العمليات.. الحل الللى قاله الأخ الدكتور القيسونى لمؤسسات التأمين. المؤسسات الحكومية يعنى لا بأس من إن مؤسسات التأمين أو البيوت المالية الكبرى الحكومية أو وزارة الخزانة، إذا كان ممكن بطريقة معينة أنها تشتترك بجزء من رأس المال، ويبقى الجزء الآخر فى هذه الحالة عبئه يقع على عاتق المشروع. ودا يكون أفضل بكثير لو قدرنا نقول إن رؤوس الأموال أو الأصول الثابتة تملك للخزانة، ويبقى المشروع يقوم بأعمال رأس المال عامل إذا أمكن.. إذا مأمكنش يبقى على الأقل فيه نوع من المساهمة.

وبعدين أخيرا سيادتكم أشرت الى نقطة خاصة بالأسلوب، يعنى يمكن العرض الللى أنا كنت بقوله دا باستهدف إن احنا بنحط مسئوليات معينة محددة على عاتق كل جهة؛ يبقى مسئولية القطاع الإنتاجى عليه يدرس خط الإنتاج وخط المستلزمات مسئولية التموين مثلا عليه، خط الاستهلاك مسئولية الحكومة على كذا، ويبقى نعمل groups فعلا للدراسة بهذا الشكل.

## سرى للغاية

سيادتك أثرت نقطة اللى هى نقطة الأسلوب، أنا متهيألى برضه أنا متفق فى إن الأسلوب يجب أن يتعدل، الأسلوب اللى يعطى الدوسيه لازم يكون جهاز على، يعنى جهاز final رأيه مسموع وملزم ورأى مطلق وحكمه نهائى. إزاي يكون؟ يعنى فيه أمثلة كثيرة معرفش يمكن مثلا كان فى انجلترا بعد الحرب سمعت حاجة زى كده عملوا أظن British industrial development plan، وحطوا فيها أساطين من الاقتصاد والبنك المركزى بتاعهم، ومكانش فيه مشروع أبدا يمشى إلا لما يأخذ approval و sanction من ال board دى لدرجة إنهم كانوا بييجوا على القطاع الخاص ويحكموا على مشروع يقولوا: المشروع دا فاشل ويتقفل وكان بيتقفل! أنا كنت هناك وشفنا بعض حالات بهذا الشكل، وبعدين كان بيدوا مشروعات ثانية قروض أو أى شئ علشان يعينوها الى مراحل أحسن. طبعا فقط إخواننا الاقتصاديين يقدرنا يعنى يصوروا الشكل بتاعها، إنما أنا متهيألى هى تكمن فى حاجة بالشكل دا إن يبقى فيه جهاز للترشيد له رأى مطلق وحكمه يكون نهائى على جميع القطاعات.. دى تقريبا الصورة.

عبد الناصر: حكاية التملك دى فيها شغلانة شوية.

البشرى: لا.. أنا بقول: التملك زى ما قال الدكتور القيسونى..

عبد الناصر: هو يعنى إنتو الاتنين.

البشرى: هو أصل يافندم الحقيقة فيه صعوبة قوى.

عبد الناصر: آه.. لأ بنحلها بس بدون..

البشرى: رأس مال الشركة كله عبارة عن قرض.

معى الدين: قرض لشركات التأمين.

عبد الناصر: لأ.. يعنى بنحل الموضوع بدون ما ينحرف تفكيرنا الى حلول بهذا الشكل.



## سرى للغاية

البشرى: من هيئة التأمين والمعاشات.

عبد الناصر: وأظن صدقى كان ابتدا يعمل العمليات دى فى الوزارة اللى فاتت.. تعديل رؤوس الأموال وتعديل مراكز الشركات وكل..

البشرى: عندنا دراسات دلوقتى يافندم جاهزة.. إحنا خلصنا الدراسات.

سليمان: آه.. ماهو المفروض يعنى إن القطاع العام كله مملوك لوزير الخزانة.

القيسونى: أنا مكنتش بادعو الى نقل الملكية من الحكومة الى الهيئات، ولكن كنت بقول: إن الدين دا هو يمثل الصورة اللى احنا ماشيين عليها يعنى إذا كان يدل..

عبد الناصر: آه.. إذا كان عملنا كذا يبقى كذا، لكن دا شماعة! (ضحك)

أصوات: (ضحك)

البشرى: لا.. والله يافندم دا أنا يعنى..

عبد الناصر: بتاع البشرى تسميه ثانى.

البشرى: يعنى مفيش فرصة حتى علشان.. (ضحك) مفيش وسائل.

عبد الناصر: أيوه.

مرعى: هو لو سمحت سيادتك يعنى أنا بدى استخلص حاجة مش عارف يعنى الفهم فيها أصبح سليم؛ لأنه يعنى المواضيع تشعبت قوى وبأعود بالذاكرة يمكن لاجتماعنا الأول فى هذه اللجنة اجتماعنا الأول فى هذه اللجنة كان جزء أصيل منه المذكرة الاقتصادية لبحث النواحي الاقتصادية، ثم تفرع وكان لا بد أن يتفرع الى النواحي السياسية لعلاقتها بالنواحي الاقتصادية، وأثيرت بعض مناقشات خاصة بالجانب السياسى. وأنا هسيب الجزء الخاص بالجانب السياسى إنما بدى أطلع على الموضوع الاقتصادى، وشايف إن

## سرى للغاية

فى الجلسات الثلاثة الأخيرة اتكلمنا باتساع وكأن فى ذهننا إن احنا بنمهد لوضع خطة ستبدأ من العام القادم، وكأننا فى ظروف عادية وبنمارس الخطة فى الخمس سنين وبتعيدنى الذاكرة للفترة التى كنا بنناقش فيها الخطة الخمسية الأولى.

الواقع الوضع مانيش قادر أتصوره بهذا الشكل، لا ظروف البلد بتسمح إن أنا أفكر من سنة ١٩٧٠ بالضبط موقفى هيكون شكله إيه؟ ولا الموارد اللى موجودة ولا من المذكرات المختلفة سواء فيما يختص بميزان المدفوعات أو فيما يختص بالمديونات الخارجية، بتجعلنى فى موقف أرسم فيه السياسة بتاعتنا فى سنة ١٩٧٠. وربما إنه يكون من الخطأ الكبير جدا إنى أبندى أرسم هذه السياسة رسم تحديدى من الآن؛ لأنه إذا كان الموقف على هذا الوضع محتمل إنه يحصل شئ من الانكماش الكبير فى الخطة من سنة ١٩٧٠ ومحتمل تتحسن الظروف ومحتمل أنها تسوء أكثر؛ وبالتالي مانيش شايف إنه من التفكير العملى إن احنا نبدأ باتساع فى مناقشة الخطة لسنة ١٩٧٠.

أنا متصور عندما تكلمنا فى تقييم الخطة اللى فاتت وأثرها، إن احنا كنا بنرد على تساؤل بدأ من السيد الرئيس.. ماهى الأسباب التى أدت الى الوضع الاقتصادى الحالى؟

فى هذا الإطار كان تصورى وإحنا بنتكلم على تقييم الخطة اللى فاتت، إنما مانيش متصور إن احنا بنعد لخطة تبدأ سنة ١٩٧٠. طبعا إذا كان التخطيط يريد أن يدرس لسنة ١٩٧٠ ماحدث يقدر يمنعه، إنما مانيش متصور إن اللجنة فى متناولها وفى رأى أنه لا يجب أن يكون فى متناولها وضع خطة لسنة ١٩٧٠.

أنا أقابل الآن ظرف طارئ، مقدرش أبدا أتغاضى عن هذا الظرف الطارئ بالنظر أو أنى استشف ما الذى سيحدث سنة ١٩٧٠ فيما يختص بميزان المدفوعات أو فيما يختص بالمديونية، طب يبقى إيه الموقف؟

الموقف فى رأى إن فيه وضع اقتصادى معين، هذا الوضع الاقتصادى المعين يجب أن يحدد ويحدد على التزام السننتين القادمتين فقط؛ بمعنى أن يحدد ما هو القدر من المديونية الخارجية اللى أنا مطالب بدفعه فى العام القادم؟ أبقى فاهمه وعارفه ومحدد ومتفق عليه من جميع الجهات المعنية. وليس مجال هذه اللجنة هو بحث هذا الموضوع؛ لأنه هو دا بنفقد فيه عشرات الجلسات.. طريقة الحساب إذا كانت مختلفة الأساس يكون مختلف وجايز كله يكون صحيح، جايز الأساس اللى تبع وزارة الخزانة أو وزارة الاقتصاد هو رأى اقتصادى سليم، والرأى اللى بيبجى من وزارة التخطيط هو أيضا رأى اقتصادى سليم، والرأى اللى بيبجى من جهاز المحاسبات هو أيضا رأى ثالث

## سرى للغاية

اقتصادي سليم، إنما مش متصور إن عمل اللجنة ولا إحنا نحمل هذه اللجنة أن تفرز وتبت في هذه الأرقام! أنا عايز أعرف أد إيه الدين اللي على هدفه بالعملة الحرة السنة الجاية؟ عايز بييجي لى الرقم واضح من هذا متفق عليه من جميع الجهات!

ماهو المبلغ الذى أدفعه بالعملة الثانية السنة الجاية بعد إجراء عمليات الجدولة وبعد تقسيط وبعد ضبط المبلغ؟ وطبعاً أنا متصور إن اخواننا اللي هيطلعوا هذا المبلغ بيكون فى ذهنهم؛ إنه كلما خفت على الأعباء فى العام القادم وكلما خفت على الأعباء فى العام الذى يليه.. دا معناه إن أنا هقدر أقف على رجلى وأقدر أبتدى من سنة ١٩٧٠ بداية سليمة.

يبقى إذاً أنا مش متصور إنه عملنا هنا أبداً إن احنا تناقش هذه المديونيات هذه المناقشة الفنية، وإلا إحنا بنحمل نفسنا مسئولية يعنى فى الواقع بنرجع نحاسب عليها بعدين؛ لأنه بنوافق على حاجات طب ما هو يعنى كيف أطلب من واحد زى حالاتي إنه يتبخر هذا كله فى الاقتصاد؟ ماأقدرش! يعنى ماعرفوش.. ببساطة كده ماعرفوش، وجايز أوى لما أقعد مع التخطيط أقتنع ولما أقعد مع الاقتصاد أقتنع وأما أقعد مع جهاز المحاسبات أقتنع؛ لأنه ليس فى متناولى.. ماأقدرش ماأعرفوش! الناس الاقتصاديين عليهم يقولوا لى ببساطة: إيه المبلغ اللي أنا هدفه من النقد الحر، ما هو الميزان التجارى بتاعى بالنسبة للبلاد الأخرى محدد فى مبلغين، وإحنا بنقول لهم: إن توجيه اللجنة لكم فى هذا إن كلما المبلغ دا كان بسيط فى السنة الأولى وكلما كان بسيطاً فى السنة الثانية، دا بيساعدنى.

وبعدين إذا أردتوا معونة سياسية، استمدوا المعونة السياسية من الجهات التى تعاونكم فى ذلك؛ لأنه بقدر ما يمكن خفضوا لنا هاذين المبلغين.

ده الأساس الأول اللي أنا بشوفه يجب إن احنا نحطه؛ حتى نقدر نطلع بحاجة حاسمة.

النقطة الثانية..

عبد الناصر: بس أنت طلعت بهذا الأساس بعد المناقشة يعنى. (ضحك)

مرعى: لا.. والله يافندم برضه فى المذكرات لما قرينتها، يعنى أنا قرئت المذكرات اللي بتيجي كلها وآخرها مذكرة الدكتور نزيه يعنى ولو جت بسرعة يعنى الواحد بيلوص يافندم! أنا بأعبر عن نفسى يمكن غيرى أقدر منى إنما فعلاً بالوص. أما باقرأ مذكرة الدكتور نزيه أقتنع على طول الخط بوجهة نظره لأنه كلام جميل جداً، أقرأ مذكرة حسن زكى..

## سرى للغاية

عبد الناصر: ألوص دا يعنى إيه؟!

مرعى: يعنى لأ.. يتوه.. يتوه يعنى.

عبد الناصر: لأ.. أوصت يعنى يوصل ولا..

مرعى: لأ.. يتوه. لأ.. هنا مقصود بيها التوهان مش الوحلان! (ضحك) وأنا يافندم أنا أما باقرأ مذكرة التخطيط ما أنا بأقتنع بيها، وبعدين لما باقعد أسمع كلام أخواننا هنا بالآفنى مقتنع بعشرين حاجة هى متناقضة! وبعدين بيقول لى: اتفضل بت بقى! طب أبت إزاي؟!

أنا مقدرش أبت أنا أبت بسهولة جدا ما هو المطلوب منى وبعدين أنا هترجم هذا أقول: مطلوب منى عملة حرة أد إيه نقد أجنبى فى بلاد أجنبية؛ إبقى اتفضلوا صفوه لنا بره وهاتوه لنا أنتم متفقين عليه إنما متاخدوش رأينا فيه! مثلا عملية تخفيض الديون اللى حلها الدكتور القيسونى، طب الدكتور القيسونى حلها هذا التحليل من أين أعلم وكيف يتبادر لذهنى إن الـ ٢٧٠٠ مليون جنيه داخلهم ١٨٠ مليون جنيه مثلا ديون قبل سنه ٢٥٢، هعرفها دى منين؟

عبد الناصر: ما إحنا بنقول عايزين نعرف الحقيقة، لولا الاستجابات اللى احنا قاعدين نعملها هنا مكناش عرفنا.

مرعى: آه.. بس ابتدينا نوصل.

عبد الناصر: ووصلان على الألفين وكام؟!

مرعى: ٢٧٠٠ فابتدينا نوصل الآن لنقط أساسية، أنا بدى أترجم نقط أساسية وأعكسها على سنتين قادمتين، باحط فيه أثناء السنتين القادمتين الميزانية بتاعتى اللى هى يعنى أكنها خطة لمدة سنتين. لما نيجى فى تخطيط السنتين، أنا بقى بعد المناقشات اللى جرت هنا مانيش شايف نقطة خلاف إلا نقطة فرعية فى مذكرة الدكتور القيسونى الأولى واللى رجعت لها؛ هو مقالش إن احنا نمنع الاستثمار هو قال: إن يجب إن احنا نستثمر فى حدود مواردنا وحدد هذه الموارد تحديد معين.

## سرى للغاية

فى كلام الدكتور عزيز، ومتهياًلى يعنى الدكتور عزيز واخذ خط معين واضح من الأول بالنسبة للاستثمارات وبين وجهة نظره أكثر من مرة بالنسبة للاستثمارات والمحافظة عليها، مهوش مختلف أيضاً مع الدكتور القيسونى إلا فى تقدير حجم الموارد، وإلا فى بعض الحاجات أو بعض المشروعات اللى كان بدأ بها وحفظ بها ويعتبر إن هذا استثمار محفوظ، ويبرد على التساؤلات المختلفه الموجودة بالنسبة إن ليه الاستثمارات تخلفت؟ زى ما ضرب مثل باستثمارات السد العالى.

يبقى هنا النقطة الثانية اللى أنا برضه بأطلبها ك layman من إخواننا الاقتصاديين إنهم هم يحطوها لنا واضحة، ماهو حجم الموارد فعلا بعد المناقشات اللى جرت التى يمكن أن أسير عليها لمدة سنتين قادمتين؟

برضه بأكرر حكاية السنتين القادمتين، إيه حجم الموارد اللى أقدر أسير فيها؟ بعدين بييجى هنا بقى إذا حددت حجم الموارد بتيجى الخطوة الثانية، القطاعات الإنتاجية. حجم الموارد وضح أماننا: القطاعات الإنتاجية فيه أسس معينة يجب إنها تكون واضحة أماننا أولاً الاستثمار الصناعى يجب إنه يستمر، استصلاح الأراضى يجب أن يستمر؛ إيقاف الاستثمار الصناعى أو إيقاف استصلاح الأراضى قطعاً ماحدش مختلف معتقدتش أن فيه حد يختلف إن هذا سيعود بالضرر على الإنتاج القومى وسيعود بالضرر على ميزان المدفوعات وسيعود بالضرر على الدولة من الناحية السياسية. إنما أى نوع من الصناعات وأى نوع هى بالصدفة محددة فى الزراعة، بأنها جاية فى التوسع الأفقى اللى هو يعنى ملوش نوع إنما فى الصناعة يجب تحديدها.

فى تصورى أيضاً إن الأمور حلها نفسها فى هذه النقطة، حلها نفسها إزاي؟ فيه مصانع موجودة، باين من كلام السيد وزير الصناعة إن فيه مصانع جت من بره ورأس المال الأجنبى بتاعها إندفع فعلاً، وهذه المصانع موجودة يبقى على طول هذه المصانع يجب أن تقام؛ لأن أنا بافتراض أن هذه المصانع لما استوردت من الخارج استوردت وقد درست اقتصادياتها دراسة سليمة، زى الأخ عزيز ما ضرب مثل بمصنع حلوان.

بافتراض إن فيه صورة برضه مبقيناش مختلفين عليها، يعنى أنا بادية الأولوية الأولى للصناعات اللى الحاجات اللى موجودة فعلاً والاستثمارات الأجنبية حققت.

الأولوية الثانية بأديها لنوع من الصناعات زى صناعات السماد، اللى محدش مختلف عليها.. أى توسع فى صناعة السماد سواء على صورة الشركات الأجنبية اللى عايزة إنها تساهم فى الإنتاجية الصناعية أو عن أى طريق آخر.. يبقى صناعة السماد برضه مش مختلفين عليها بأديها الأولوية الثانية.

## سرى للغاية

أى صناعة مترتبة على الكهرباء استعمال السد العالى، بأديها أولوية برضه فى فترة السنتين. أى صناعة غذائية زراعية - زى ما أنا أشرت مرة فى حديثى - المادة الخام موجودة وتصنيع الزراعة أمر واجب، وخاصة فى الأراضى المستصلحة الجديدة اللى هى بتكلفنا فى الرى تكلفة بالغة واللى هى لن تغطى اقتصادياتها بدورة زراعة عادية، يجب أن التصنيع الزراعى يخش فيها.. يبقى دا بيحدد لنا شكل الصناعة.

لما بنيجى فى شكل الزراعة، ماهو نوع التوسع الرأسى اللى يجب إن احنا نسير فيه فى فترة السنتين؛ أنا ضربت مثل بأراضى الحياض اللى هو بنقول: إن عندنا ٩٠٠ ألف فدان تخلفوا - ٩٠٠ مش ٩٠ ولا ١٠ متخلفين - يبقى دول ببيرزوا على طول فى ناتج سريع ييجى فيما لو إتعمل لهم خطة معينة. ودا اللى دعانى إنى أطلب من اللجنة وأرجو من سيادة الرئيس، إنه بنرفع موضوع الحياض الى لجنة على المستوى الـ national لأنى أنا شاعر بأهميته وشاعر إن أى زيادة إنتاجية فى أراضى الحياض - وقد انخفضت فى الفتره اللى فاتت - قطعاً بتدينى تأثير قوى.

أما بنيجى لاستصلاح الأراضى، بنقول: يجب إن احنا نسير فيه على وجه سريع، ودا أمر برضه أنا مش متصور إن حد يختلف فيه، إنما بنقول: إن احنا نحسن الاستزراع مع الاصلاح؛ لو بأجمع البرنامج الصناعى فى الشكل البسيط اللى أنا بقوله، وبأجمع البرنامج الزراعى فى الشكل البسيط اللى أنا بقوله، وبأقارن دول بقى مع الموارد. بتيجى نقطة هنا بارزة بعد ما حددنا الموارد، لأ.. دا أصبح قدامى صناعة محتاجة فلوس أكثر أو زراعة فى هذه الأبواب بنحتاج لفلوس أكثر، بنقدر إن احنا نرتب الأولويات؛ دى الصورة التخطيطية اللى أنا شايف أنها توصلنا الى طريق عملى فى العملية.

بارجع بقى استكمل هذه الصورة، هل دا كافى؟ هل دا كافى لأن احنا نواجه

الموقف الحالى اللى موجود؟!!

أنا برضه أقول: لأ.. دا مش كافى لأ.. دا مش كافى؛ لأن دا جزء تنفيذى متعلق بربط ميزانية أو متعلق بخطة عاجلة لمدة سنتين يجب يحصل تغييرات أخرى.. التغييرات الأخرى بتحصل فين؟ نظامنا فى القطاع العام، هل قادرين ناخذ القدرة بتاع القطاع العام على آخرها؟ ماهى الأسباب وما هى المسببات؟ وقد ناقشت اللجنة ذلك برضه فى أكثر من مرة، اختلف البعض إن الوسائل التنظيمية فى القطاع العام..

## سرى للغاية

وأنا بشوف إن القطاع العام فى تأثره هو.. أولاً: نقص مستلزمات إنتاج، وإن احنا ضغطنا على العاملين فى هذا القطاع العام ضغط أزيد من اللازم، وإنهم ابتدوا إنهم يزهدوا.. عندهم حالة سد نفس موجودة! دا تصورى فى القطاع العام مهواش العيب فى القطاع، ماهو الشركات فيه شركات كثيرة جدا فى القطاع العام متاخده من قطاع خاص وبتشتغل فى القطاع العام أحسن بكثير جدا مما كانت بتشتغل فى القطاع الخاص، وفيه صورة عكسية، وفيه صورة شركات نشأت قطاع عام ومش قادرة تمشى. يعنى أنا مثلا بيحضرنى فى هذا مصانع السماد، طب عبود ما كان شغال مصنع السماد، وبعدين اشتغل قطاع عام، هل إنتاجه قل؟ هل فيه شكوى؟ هل إحنا بنشكى من الناحية الزراعية فى مصنع.. من مصنع كيما أو مصنع السويس إنه بيأخر على شحنة أو بيدنى سماد مش مضبوط أو إدانى نسبة معينة؟ لم يحصل هذا، ففيه نواحى قدرة معينة موجودة فى القطاع العام وفيه نواحى بتتمثل فى عدم القدرة فى القطاع العام؛ يبقى دى برضه بنحطها، وأنا سعيد لما سمعت أن السيد زكريا محى الدين بيجهاز حاجة فى دى لأن دى تكمل الصورة.

نكمل أيضا.. النقطة الثانية اللى هى أثرت وبعدينا عليها بسهولة، طب دور القطاع الخاص وتطويره إيه؟ الدكتور عزيز مقدم مذكرة فى الموضوع ده، أنا تصورى إن القطاع الخاص مش حيتطور بهذه السهولة، وتصورى أن القطاع الخاص لازم نفكر له فكرة جديدة. وأنا ادبت التطور اللى حصل فى يوغوسلافيا كتطور، وقلت فى الجلسة دى: إنه مانيش دارس التصور دا كامل إنما كفكرة إنه لا بد أن يحصل تطوير فى..

عبد الناصر: هنبعتك يوغوسلافيا عشان تصح معلوماتك! (ضحك)

مرعى: (ضحك) أنا مستعد يافندم، يعنى لا بد إنه يحصل تطوير فى..

عبد الناصر: بعد الشتاء شوية.

مرعى: إن شاء الله، يعنى لا بد يحصل تطوير فى القطاع الخاص لأنه المستفيد..

عبد الناصر: تشوف الـ social sector هناك.

## سرى للغاية

مرعى: آه.. يعنى اللى هو جعلنى أقول إنه يتخلق حاجة جديدة.. الحاجة الجديدة اللى تتخلق ما أنا عايز أجدب انتباه الناس وعايز أخلى القطاع الخاص بيعمل فى نفس الخط اللى بيعمل فيه القطاع العام، ومش عايز يحصل استغلال فى القطاع الخاص.. يعنى بيتعمل له نقاط معينة والناس.

يعنى كمثّل بسيط يافندم على أن ننشط قطاعات مختلفة، طب نأخذ الموالح السنة دى.. تصدير الموالح السنة دى هيوصل رقم يعنى أنا مبقولش إنه كبير قوى، يعنى يمكن يوصل لوزارة الاقتصاد ما بين ٢٧ ألف طن الى ٣٠ ألف طن. أنا قلت للأخ حسن من أول الموسم: يجب أنك توصل لـ ١٠٠ ألف طن السنة دى لأنه عندنا يعنى كمية الطرح اللى جت السنة دى يعنى كمية عجيبة الشكل.

الأخ حسن عمل مجهود كبير جدا؛ لأنه هو كان عامل ميزانية على ١٠ آلاف طن اللى هم بنصدرهم كل سنة فابتدا ينشط القطاع الخاص، ومشى القطاع العام؛ يعنى اللى بيصدر بالقطاع العام واللى بيصدر بالقطاع الخاص دلوقتى هيوصلوا قرب ٢٧ ألف طن. يعنى لو كان فيه التصور إنه رقم ٥٠ ألف أو بتاع كان ١٠٠٪ نقدر..

محي الدين: مفيش عبوات كفاية!

مرعى: آه.. مفيش عبوات، كنا نقدر نوصل لـ ٥٠ ألف طن، وعلى ذلك من ابتداء العام القادم يجب إنه يكون فيه ١٠٠ ألف طن.

عبد الناصر: بس طلع برتقال.

مرعى: السنة الجاية إن شاء الله .. آه يعنى هو فى ظروف الزراعة يعنى فيها عوامل يعنى بتيجى من عند رينا، منقدرش نقول إن احنا اللى طلعا محصول البرتقال يعنى آهو جاء كده. يظهر البرد بتاع السنة اللى فاتت أثر فى عملية التزهير والعقد، يعنى كان نسبة العقد نسبة مرتفعة قوى خصوصا فى أبو صرة لأن أبو صرة كان بقى له ٣، ٤ سنين حملة وحش. السنة دى حملة يعنى بيتباع أقل من التسعيرة، أبو صرة دلوقت بـ ٣,٥ صاغ، بياخدوه تسليم الجناب للتصدير لبره داخل الصندوق بأربعين مليم الكيلو.. ٤ صاغ الكيلو جوه الصندوق اللى صالحه للتصدير جوه الصندوق! عمرها ما حصلت يعنى أرخص مادة موجودة فى الدولة دلوقتى البرتقال أرخص من الفجل يعنى كيلو الفجل.. يمكن بأكثر من أربعة صاغ!



## سرى للغاية

عبد الناصر: فيه ناس هيسمعوا الكلام دا يجيبوا الحلو فجل! (ضحك)

أصوات: (ضحك)

صدقى: ماهو راخر دلوقتى بيقولوا: الفجل.. الفجل يبقى بالكيلو!

مرعى: فأنا برضه يعنى فى ذهنى فى تطوير القطاع الخاص، إزاي يتطور القطاع الخاص؟  
مأمشيش فى الخط بتاع تشجيع القطاع الخاص ومأمشيش أيضا فى الخط اللى ينعل  
أبوهم مستغلين ولاد كلب لازم نقطم رقبتهم.. برضه مأمشيش فى هذا الخط  
ومأمشيش..

عبد الناصر: هو القطاع الخاص غلبان دلوقت.

مرعى: مبقاش فيه مجالات يافندم، أما أتصور فى تصدير الخضر فى تصدير الزهور.. طب  
تصدير الزهور عانينا منه السنة اللى فانتت معاناة ملهاش أول ولا آخر، طب الورد  
ماشى السنة دى إنما ماشى ليه؟! أربعة خمسة بيصدروا، ماهوش ممكن لأن دا بيطلع  
الساعة ٣ صباحا حاطط الورد فى أتومبيل وتته قاعد فى المطار لحد ما يحط الورد دا  
فى الطائرة. طب وبعدين بنطلع عنيه نمرره على مراقبة صادرات ونمرره على حجر  
زراعى ونمرره على معرفش إيه! طب ماهى الأضرار التى تنشأ من تخصيص  
sectors معينة، هو القطاع الخاص بطبعه يقدر ينشط فيها ولن تؤثر على أنا من  
الناحية الاشتراكية فى شئ، وبوادرها إبتدت تبان.. فيه صناعات خان الخليلى فيه  
الموبيليات، فيه اللى معرفش إيه يعنى فيه أسلوب كبير ماهوش فى ذهنى بالضبط،  
ماهو تطوير إنما أنا بأطالب إنه نعمل حاجة فى تطوير القطاع الخاص.

ده تقريبا بيجمع النقط اللى أنا حبيت إنى أثيرها، وبعدين بأجى فى ختام هذه  
الدراسة من المشروعات المختلفة من التخطيط من الموارد، باترجم دا بقى.. ماهو تأثير  
هذا فى ميزان المدفوعات؟ ماهو تأثير هذا فى المديونية الخارجية؟

## سرى للغاية

إذا قدرنا نعمل الورقة بهذا الشكل، يبقى فى اعتقادى إحنا قطعنا مرحلة كبيرة بنقدر نقابل بيها الوضع بتاعنا بتاع السننتين. من هنا للسننتين الجايين والله وزارة التخطيط، تبتدى ترسم لنا الخط البيانى بتاع الاستهلاك والخط البيانى بتاع معرفش إيه على مهلهما فى الفترة اللى جاية.  
وشكرا.

سليمان: مقدرش أحسب الموارد إلا لما نتكلم.

محي الدين: ماهو لازم تتحسب، إنت بتقول فى إيه بس ماهو قبل ما تعملوا الإجراءات اللى إنتو بتقولوا عليها دى إدونا صورة المستقبل يبقى إزاي؟ فقدمنا صورة ٧٥/٧٠ مش معانا فى..

مرعى: لا.. لا.. ما أنا مش عايز أروح قبل..

محي الدين: ما إحنا مقدمين إطار بس مطلوب مناقشته تفصيليا.

مرعى: أصل أنا خايف لو نروح بعيد لـ ٧٥ هنروح بعيد قوى!

محي الدين: صعب.. صعب تناقشه، ما أنا بقول لك: صعب تناقشه لكن بندى صورة تقريبية على ما يمكن أن يتحقق.. صورة بره الخيال بعدين طبعا عشان نوصل للهدف دا عاوزة بقى معركة..

مرعى: إدينى بقى السننتين دول.

محي الدين: هنحط السننتين إحنا قلنا هنحط.

مرعى: لازم بييجو السننتين.

محي الدين: هم جايين السننتين.

## سرى للغاية

مرعى: وعلى ضوء السنتين أنا باقدر أرتب نفسى؛ لأن الميزانية الجديدة داخلة، لو إحنا داخلين لسه فى الخطة والميزانية الجديدة جت هبص نلاقيها تهبش، عزيز يروح يقفش كل الاعتمادات فى الخطة ويسببني أنا!

صدقى: هو عنده حاجة!

مرعى: يعنى أنا رضيت بالنقد الأجنبى.. مرضتيش..

صدقى: بس فى القطاع الخاص يعنى على الأقل نزيل من قدامه المعوقات الموجودة.

مرعى: لأ.. أنا مش معارض النقطة دى بس بقول لك: مش هنطور، نفسى يفكروا حاجة جديدة.

سليمان: معندوش ثقة.

عبد الناصر: أيوه.. يا..

شقير: تسمح لى يافندم، هو واضح الآن من المناقشات الطويلة اللي دارت فى الجلسات الماضية إن إحنا أمانا نوعين من المهمات..

المهمة الأولى: هو تصوير صورة رقمية وسياسة اقتصادية تفصيلية سواء فى نطاق الميزانية أو فى نطاق الخطة لفترة السنوات القادمة، سواء كان السنوات دول هما السنتين الجايين أو السنوات بعد ١٩٧٠.. دا هيفتضى إتخاذ سياسات لا شك فيها.

الجانب الثانى: وهو الجانب المهم فى الحقيقة جدا واللى باعتقد إن الواجب يكون مدخلنا لدراسة كل هذا، هو السؤال الآتى.. هل نظامنا الاقتصادى بوضعه الحالى وطريقة سيره وطريقة تنظيمه والعلاقات فيه، بتضمن إننا من أى إجراء أو من أى كمية معينة من المواد أو من أى مجموعة من المشروعات، بنحصل منها على أقصى مايمكن الحصول عليه؛ وعلى هذا الأساس بيزيد الإنتاج أقصى زيادة ممكنة وبيزيد الدخل أقصى زيادة ممكنة وبيزيد الإدخار أقصى زيادة ممكنة، ولا لأ؟

## سرى للغاية

الصورة الرقمية بتاع السننتين القادمتين زائد الصورة الرقمية بتاعة الخمسية الثالثة، لا شك هتحتاج لوقت لمناقشتها بالتفصيل، والسياسات اللي تتخذ فيها أيضا هتحتاج لبعض الوقت.

هو فى اعتقادى اللجنة بتبقى أدت عمل هام جدا، لو إننا طلعتنا من هذه الاجتماعات بوضع تصور لتطوير معين لتنظيمنا الاقتصادى، يجعل هذا التنظيم أكثر قدرة على مواجهة المشاكل الحقيقية اللي كانت موجودة قبل ذلك، بعد ذلك ننقل الى مشكلة السننتين القادمتين ومشكلة الخطة اللي جاية بعد الدراسة.

الواقع لو حللنا المشاكل اللي احنا موجودين فيها بنجد لها نوعين من الأسباب.. فيه نوع من الأسباب متصل بنفس طريقة سير الاقتصاد بتاعنا.

وفيه نوع من الأسباب جايز لبعض سياسات نقدية أو مالية، أى تعديل فى السياسة المالية أو النقدية دون أن يكون مرتبط بمواجهة المشاكل الحقيقية اللي وراء كل هذه العملية ربما يريحنا فترة معينة، لكن مؤكد لن ينجح على الدوام إذا مواجهناش الجانب الآخر فى علاج كل مشاكلنا وكل الصعوبات دى.

المشاكل دى أثار جانب كبير منها الأخ سيد مرعى، ماهو وضع القطاع العام؟ هل القطاع العام بشكله الحالى يستطيع إنه يحقق كل ما يمكن إننا نرجوه على ضوء المعايير اللي قلناها؟ هل الشركات والمؤسسات.. الى آخره دى بوضعها الحالى، هل الطريقة اللي بتتعامل بيها، هل الطريقة اللي بتخطط بيها ممكن أن تسير وتستمر؟ ولأ ممكن لو تصورنا صورة أخرى إن العلاقة دى هتكون أكفاً وبتدى إنتاج أزيد وبتدى إدخار أزيد حتى من نفس الحجم الحالى من الدخل؟

بعدين واضح إن عملية المحاسبة والمتابعة والرقابة.. الى آخره، كل الكلام اللي قيل وإقرار المشروعات بيحتاج لجهاز لايد أن يقر كل ذلك على مستوى سياسى معين؛ يضمن كل الفلتان من الالتزام اللي كان موجود فى الفترة الماضية.

وضع القطاع الخاص والطاقة الإدخارية الضخمة اللي فيه والتي لايد أن نستفيدها؛ لأن فى الحقيقة الأرقام بتشير إن القطاع العام بيدى حوالى ٧٨ أو ٧٩٪ من المدخرات اللي تحققت فى خلال سنوات الخطة الأولى وسنتين من الخطة الثانية. والقطاع الخاص بيدى حوالى ٢٣ أو ٢٢٪، بينما إن وضع القطاع الخاص فى الدخل وفى الإنتاج أكثر من كده بكثير جدا، هل فيه وسيلة معينة لجعل هذا القطاع من نفس الدخل اللي بيعمله من نفس الإنتاج اللي بيقوم عليه، ممكن يدى مدخرات أزيد من هذا ولا لا؟

## سرى للغاية

ثم بالإضافة لهذا دور رأس المال الأجنبي اللى أثير، ماهو وضعنا فيه؟ وماهو الموقف اللى هنتخذه منه؟

كل هذه المسائل، فى الحقيقة لابد لو وضعنا لها فى الأول كمدخل فى جليستين أو ثلاثة وحددناها، ننتقل بعد هذا لمناقشة السنتين القادمتين، ثم ننتقل لمناقشة الخطة اللى لاحقة بعد هذا على ضوء الكلام اللى قاله الإخوان. وبقى اللى ما سنقرره فى كفاءة التنظيم الاقتصادى، يكون له انعكاس على نفس النتائج الرقمية اللى تيجى فى السنوات اللى بعد كده؛ بحيث لابد أن يدخل ذلك فى الحساب.

رفعت: يعنى هو الموضوع يمكن فى المناقشات اللى فانت تشعبت الى عدة مواضيع، وتقديرى المواضيع تداخلت فيما بينها بحيث أرى إن يجب إن احنا نحدد فى الواقع إيه المشاكل الرئيسية والمواضيع الأساسية اللى يجب بحثها؟ ثم تربط بعد كده ببعضها. لأن تقديرى المناقشة دارت يعنى مرة بتخش فى عمليات القروض الداخلية، ومرة فى القروض الخارجية، ومرة فى التمويل الخارجى والتمويل الداخلى، ثم مشاكل الإنتاج ومشاكل التنمية.. مشاكل قطاعات الإنتاج نفسها وتطويرها؛ بحيث العملية فى تقديرى يجب أنها تحدد فى مواضيع أساسية.

وتقديرى المشاكل بتحدد فى ٣ أو ٤ مواضيع أساسية وهى..

المشكلة الأولى: وهى مشكلة ميزان المدفوعات أساسا اللى احنا بنواجهها النهارده، ودى يمكن حصل فيها كلام كثير من ناحية إعادة جدولة القروض.. الى آخره أو تأجيل الأقساط أو محاولة تسديد بعض القروض قصيرة الأجل.. الى آخره؛ ودى مشكلة - تقديرى - يجب أنها تعالج كمشكلة مستقلة وعمل دراسة خاصة بيها.

المشكلة الثانية: وهى مشكلة استمرار التنمية نفسها، وقطعا واضح من المناقشات إن فيه إصرار على إن عملية استمرار التنمية دى أمر ضرورى، وإلا هيوذى الى عواقب قد تكون أسوأ من الوضع اللى احنا موجودين فيه. ولو نظرنا الى مشكلة استمرار التنمية، فبينتطرق الى نقطة مهمة وهى توفير الأموال اللازمة لعملية التنمية الاقتصادية سواء من موارد محلية أو موارد خارجية.

موارد محلية، طب ماهى مصادر هذه الموارد المحلية؟ وماهى القطاعات التى ممكن إنها تساهم فى التمويل المحلى؟ وماهى وسائل زيادة المدخرات؟

## سرى للغاية

القطاع الخاص إيه دوره؟ الرأسمالية المحلية، هل ممكن فيها مدخرات بحيث تستطيع أنها تساهم فى هذا الاتجاه أو لأ؟

من ناحية التمويل الخارجى لعملية الاستثمار أو لاستمرار التنمية من ناحية قروض قصيرة الأجل أو قروض استثمارية أو تسهيلات ائتمانية.. الى آخره، وقد تتدخل فى هذه الناحية بعض النواحي السياسية؛ سواء علاقتنا مع الدول الشرقية أو علاقتنا مع بعض الدول الغربية زى فرنسا أو إنجلترا.

بنتجى بعد كده يعنى المشكلة اللي بتتفرع عن مشكلة استمرار التنمية، هي مشكلة إزاي نعبئ الموارد لمواجهة التنمية الداخلية؟ تعبئة الموارد بتتطلب إن احنا زيادة فى الإنتاج، وزيادة فى الإنتاج بترتبط أساسا بعملية الأموال اللازمة لعملية التنمية واللازمة للاستثمار، بترتبط أيضا بتأمين وحدات الإنتاج نفسها أو تحرير وحدات الإنتاج - كما قال السيد زكريا فى هذا - ودرجة الرقابة على هذه الوحدات أو مستوى الرقابة فى هذه الوحدات، ويبدخل فى هذا أيضا إنعاش القطاع الخاص بالذات.

وأنا باقصد بالقطاع الخاص، هو القطاع المنتج فى الرأسمالية المحلية ومش القطاع المستغل أو القطاع المتطفل فى الرأسمالية المحلية؛ اللي هو إتخذت إجراءات ضده ويجب أنها تستمر لتطهير الجيوب اللي موجودة اللي قد تؤدى الى تعويق عمليات الإنتاج أو التنمية.. زى تجارة الجملة أو المقاولات الى آخره.

نقطة مهمة أيضا: وهي تطوير النظام التعاونى؛ لأن تقديرى لو طور النظام التعاونى ودعم النظام التعاونى، هيستطيع فى فترة بسيطة إنه يؤدى دوره كقطاع متكامل فى عملية زيادة التنمية وخصوصا القطاعات الحرفية. ودا تقديرى هو قطاع لا ينظر إليه الآن نظرة جدية، ويجب إن احنا نظوره بأسرع وقت ممكن، وتقديرى هيوذى الى نتائج سريعة فى السنة أو السنتين اللي جاين.

من ناحية أخرى برضه حصل كلام من ناحية التصدير وإمكانيات التصدير؛ ودى بترتبط طبعا بعملية تنشيط القطاع الخاص المنتج وتنشيط القطاع التعاونى.

بترتبط بهذه العملية تعبئة الموارد، وهي موضوع توزيع الأعباء نفسها؛ لأن يجب ألا تتحمل العملية أو يتحمل العبء كله قطاعات معينة، وقطاعات أخرى بتكون بعيدة عن هذه الناحية. معرفش إذا كان يعنى من ناحية موضوع تحديد الاستهلاك، السياسة اللي ماشية الى الآن هي عملية رفع الأسعار، وتقديرى إذا اتبعت هذه السياسة فهي هتبقى سياسية مستمرة وتؤدى الى أضرار كبيرة وأضرار على قطاعات كبيرة من الشعب! فى الوقت اللي فيه بعض القطاعات مبيهماش عملية رفع الأسعار؛ لأن عندها القدرة إنها بتأخذ اللي هي عايزاه.

## سرى للغاية

فمعرّش باطرح موضوع، هل ممكن تعميم عملية بطاقات فى سلع معينة أو لأ بدل رفع أسعارها؟ ودى قد تحل جزء من المشكلة ولو أنها يمكن لها تأثيرها السياسى فى بعض النواحي، ولكن تقديرى هى بتبقى محاولة لتحديد الاستهلاك بقدر الإمكان ومن ناحية أخرى فى توزيع الأعباء أيضا بالنسبة للقطاعات المختلفة.

من الضرورى إخضاع بعض الدخول للضريبة، اللى هى الى الآن لم تمس وبالذات فى المهن الحرة.. الى آخره. ودى الى الآن متروكة ولم تصل اليها حتى الإجراءات الأخيرة بتاعة شهر يوليو الماضى، بل يجب إن احنا نعمل على تجميد بعض الدخول اللى هى بتزيد عن الحد الأقصى سواء فى القطاع العام أو القطاع الخاص، ومناخدش العملية فقط على إنها عملية تجميد مرتبات الموظفين فى الحكومة أو فى القطاع العام.

وتقديرى هذه المشكلة الثانية وهى مشكلة استمرار التنمية، ودى مشكلة متكاملة فيما بينها وهى أساسا.. ماهى الموارد المحلية والموارد الأجنبية اللازمة لعملية استمرار التنمية فى هذا؟ مع طبعا يعنى عزل المشكلة الأولى، وهى مشكلة ميزان الدفعات وبرضه بحثها فى نطاق معين بيها.

بتجى بعد كده مشكلة وهى أثيرت برضه فى المناقشات، وهى تطوير أسلوب العمل نفسه فى قطاعات الإنتاج، والسيد الرئيس كان أشار اليها من ناحية إن احنا فى حاجة الى system جديد فى العمل. والمفهوم طبعا من هذا الكلام، أن فى النطاق الاقتصادى والاجتماعى القائم يتم تطوير أساليب العمل؛ بحيث نحافظ على الوضع الاجتماعى والاقتصادى القائم. دى يمكن كمشكلة قائمة بذاتها يجب برضه أن تعالج وأن تدرس بعناية، ودى هيدخل فيها عملية برضه الاستقلال الإدارى للوحدات الإنتاجية وتحريها، ونظام الحوافز، القيادات فى قطاعات الإنتاج، التدريب، المتابعة، ربط الأجر بالإنتاج.. الى آخره؛ وكل دى بتدخل بتطوير أسلوب العمل فى قطاعات الإنتاج.

بيصبح من الضرورى فيه مشكلة أخيرة وتقديرى أنها برضه لها أهمية، وهى كيفية ربط العمل السياسى بالعمل فى قطاعات الإنتاج، وإن مكانش بتربط العملية بهذا الشكل تقديرى هيبقى قطاع الإنتاج منفصل عن العمل السياسى اللى بيدور فى المجتمع، بل بيبقى فيه انفصال للجماهير عن حقيقة ما يجرى فى قطاعات الإنتاج. طبعا عملية الربط سواء من ناحية الرقابة من أعلى أو الرقابة من القاعدة قد تكون ضرورية، وقد تكون مناسبة خصوصا فى الظروف الحالية اللى تستهدف فى الواقع مشاركة أكثر من الجماهير فى المشاكل اللى بنواجهها النهارده، وهى مشكلة التنمية ومشكلة مواجهة آثار العدوان.

## سرى للغاية

بيبقى موضوع أخير وأنا بأحب يعنى أنبه اليه، إن المعركة اللي احنا بنخوضها هي معركة اقتصادية قبل ما تكون معركة سياسية، وتقديرى الهدف هو فرض حل سياسى فى إطار اقتصادى أساسا، والهدف هو يمكن هو مصر بالذات الى الارتباط بالاستعمار بشكل جديد. ودا يمكن الهدف النهائى من المعركة اللي حصلت أو التي لاتزال موجودة، وطبعا الدليل على هذا إن بنلاحظ اسرائيل النهارده بتتقدم بعملية علاقات اقتصادية أو تجارية.. الى آخره، وطبعا هي مش اسرائيل اللي بتقوم بهذا هي طبعا أمريكا اللي ورا العملية.

ومن هنا يعنى بدى الواحد يعنى ينيه، إن المعركة فى النهاية اقتصادية مهياش سياسة وهي فرض حل سياسى ولكن فى داخل إطار اقتصادى؛ ودى يمكن بتحدد أسلوبنا فى العمل وطريقنا فى العمل خصوصا فى المراحل القادمة.

عبد الناصر: بيتهيالى يعنى كل النقط حصل كلام فيها، وبعدين اللي أنا متصوره إنكم قلتم الدور اللي فات إنكم عايزين تعملوا دراسات، وكل موضوع عايز مذكرة وكلام بهذا الشكل؛ إن احنا بناخد زى ١٠ أيام نعمل يوم الأحد الجاى اجتماع لمجلس الوزراء ونتكلم فيها.

وبعدين بعد ما يرجع بعد زيارة تيتو.. أظن يوم ٤ أو يوم نخليها يوم التلات، ييجى يوم ٦ يبقى يوم ٧ أو يوم ٨ نعمل اجتماع وبرضه تبحنوا.. المذكرات أظن المواضيع كلها محددة.

السيد مرعى قال وبعديه كمال رفعت قال أيضا والقيسونى قال أيضا وكل واحد فينا هنا أظن قال كل حاجة.

محي الدين: هو إحنا جاهزين بموضوعين الحقيقة.. موضوع خاص بسياسة الأجور وفيه مذكرة موجودة فعلا بس اتأخرت النهارده كان ممكن تتوزع، وموضوع خاص بتنظيم القطاع الخاص وإعادة تطويره، فعلى كل حال يعنى حسب متشوفوا ظروف الاجتماع.. إذا كان يوم ٧ ممكن.

عبد الناصر: وتبعنوا لنا المذكرات.



## سرى للغاية

محي الدين: نبعثها قوى ممكن، هو بس أنا عاوز أضيف حاجة إنه الحقيقة موضوع القطاع الخاص  
يعنى يحتاج إنه يدرس أيضا فى اللجنة إذا كان ممكن لإنه..

عبد الناصر: إحنا حولنا دا للجنة الخطة وأظن..

محي الدين: ما هو إتحول من مجلس الوزراء للخطة وفيه مذكرة فعلا موجودة.. وفيها إجراءات معينة،  
ولكن حقيقى هى مش موضوع الإجراءات.. هو موضوع أكبر من المذكرة وأكبر من  
لجنة الخطة، عاوز سياسة معينة بالنسبة للقطاع الخاص؛ عشان يعنى فى حدود معينة  
يقدر يعرف إنه يشتغل، ويقدر إنه على الأقل يحافظ على وضعه الموجود حاليا؛ لأنه  
بالصورة اللي احنا شايفينها إن القطاع الخاص هيتدهور باستمرار.

عبد الناصر: سلام عليكم.